

Kalata gwa kwanda ugwa Pauli ku Bakolinti Isyakulongosya

Untumigwa Pauli aasimbile kalata uju ku Bakilisiti abaa mu Kolinti, aka kaali kaaja kafumuke nkiisu ikya Bugiliki. Pauli aalumbiliile nkaaja ako ikyinja kimo nu kukindapo (imbombo sya Batumigwa 18:1-18), abandu bingi baalimmwitiike Jesu. Looli Pauli bo aasookileko ku Kolinti, aBakilisiti balinkwanda ukutapukana ndwitiko. Aasimbile kalata uju ukubatula aBakilisiti bala, ukuti biimege kanunu ndwitiko.

Mwa kalata uju, ikulingaania ububiibi ubwa kutapukana abiitiki nu kukaanikana isya lwitiko nkipanga kya Kyala. Ikulingaania muno Mbepo Mwikemo ikutapapo ifikungilwa fingi, fiijo bo ulugano, ulu lukututula ukummwipuuta Kyala nu kuja na kajiilo akanunu ndwitiko. Kangi ikubakumbusya ukuti paapo Kilisiti aasyukile ukufuma mbafwe, tumeenye ukuti na nuuswe ikwisa kutasyusya ukuja buumi kangi.

Isi silimo mwa kalata uju
Pauli ikubaponia aBakolinti nu kugwa ulupi kwa Kyala kunongwa jaa Bakolinti
Ikulingaania isi aasipiliike isya kutapukana nkipanga kya Kyala
Ikubasoka abiitiki aba bali na kajiilo akaa bulogwe, nu bubungwa
Imanyisyo isya bwegi
Imanyisyo isya kajiilo aka kikulondigwa ukuja nako pa baraka
Imanyisyo isya muno aBakilisiti bikulondeligwa ukwitikana
Imanyisyo isya kusyuka ukufuma mbafwe
Uluabaatiko lwa Pauli ulwa kufijaatila ifipanga fya Kyala

Uluponio

¹ Kalata uju afumile kumyangu une Pauli, ne Kyala aambilikiile ku bwigane bwake ukuja ntumigwa gwa Kilisiti Jesu. Une na Sositeni, ugwamoyitu ndwitiko,

² tukubasimbila umwe mwe baa nkipanga kya Kyala iki kili mu Kolinti, umwe mwe Kyala abapelile ukuja biikemo nkulungana na Kilisiti Jesu, nu kubabilikila ukuja bandu baake. Ukubombeligwa bo ulu, muli pamopeene na bandu boosa popoosa apa balipo aba bikunsuuma uNtwa Jesu Kilisiti, uju jo Ntwa gwabo kangwi gwitu.

³ Iliipyana nu lutengaano ukufuma kwa Taata Kyala na ku Ntwa Jesu Kilisiti, fijege na nuumwe.

Pauli ikugwa ulupi kwa Kyala kunongwa jaa Bakolinti

⁴ Ngugwa ulupi kwa Kyala gwangu bwila kunongwa jinu, paapo abapeele iliipyana lyake mwa Kilisiti Jesu,

⁵ namanga mmyake mupeeliigwe ubukabi ubwa fikungilwa ifya luko lwingi, mmasyu giinu na mmahala giinu.

⁶ Ubukabi bwinu ubo, bukunangisya ukuti iNdumi iNunu jila ijaa Kilisiti, iji twalumbiliile kumyinu, jo jaa bwanalooli.

⁷ Na ulu mukaagilwa ikikungilwa nakimo ikya Mbepo Mwikemo, bo mukuguulila ukusetuligwa ukwa Ntwa gwitw Jesu Kilisiti.

⁸ Umwene ikubakasyaga, ukuti mulingiisa kulongigwa ukujabwala pi isiku lila ilya kummaliikisyo, ili ikwisa kusetuligwa.

⁹ Kyala jo gwa bwanalooli. Ukwendela mmyake, mwabilikiliigwe ukujabwala buliilanisi na Mwanaake Jesu Kilisiti, uNtwa gwitw.

Ukubasoka abiiiki aba bikutapukana

¹⁰ Baamyitu ndwitiko, ngubapyelesya fiijo mu ngamu ijaa Ntwa gwitw Jesu Kilisiti, mujege bandu baa kupilikisania. Mulingatapukanaga, looli mujege kanda kamokeene kuli isi mukwinogona, kangi mujege ni nyango jimojeene.

¹¹ Baamyitu, abandu bamo abaa nnyumba ijaa Kilo, baambuulile ukuti buliko ubukindane kumyinu.

¹² Isi ngulonda ukujabwala syo isi, kukuti mundu ukujabwala isyake. Jumo ikuti, "Une ngunkonga Pauli." Ujungi ikuti, "Une ngunkonga Apolo." Ujungi ikuti, "Une ngunkonga Peeteli." Ujungi ikuti, "Une ngunkonga Kilisiti."

¹³ Bule, Kilisiti iijabeenie? Bule, aali jo Pauli uja aafwile pa kikohekano kunongwa jinu? Bule, mwalyosiigwe mu ngamu ijaa Pauli?

14 Ngugwa ulupi kwa Kyala paapo kumyinu naaboosiisye beene baa Kilisipo na Gajo, ngaa-boosiisye abangi.

15 Po ulu akajako ujū abagiile ukujoba ukuti, oosiigwe ku ngamu jangu.

16 (Kangi naaboosiisye abaa nnyumba ijaa Sitefana, ngamanya ukuti naalimmoosiisye mo ujungi.)

17 Namanga Kilisiti akaalindumile kukoosya abandu, looli kukulumbilila iNdumi iNunu, kisita kusubila amahala gangu ukujoba kanunu, ukuti ndingapungusya amaka agaa kikohekano ikya Kilisiti.

Amahala na maka agaa Kyala

18 Isya kikohekano ikya Kilisiti kuli aba bikusoba bikwaga bukonyofu, looli kumyitu uswe twe tukupokigwa, inongwa isyo maka agaa Kyala.

19 Bo muno sisimbiigwe mwa Kalata uMwikemo ukuti,
“Abandu abaa mahala ngoonanga amahala gaabo,
abamang’anyi ngoomola ubumang’anyi bwabo.”*

20 Po ngubalaalusya, bali kuugu abaa mahala abaa kabalilo ako? Bali kuugu abamanyisi baa ndagilo? Bali kuugu aba bikuti basyageenie syosa? Kali, Kyala akagapela amahala agaa pakiisu apa ukuja bukonyofu?

21 Mmahala gaake, Kyala aabapeele abandu abaa pakiisu apa ukuti batoligwe ukummanya

* 1:19 1:19 Bala kalata gwa Jeeseja 29:14.

ukwendela mmahala gaabo. Looli Kyala iiganile ukubapoka abandũ beene aba bikummwitika, ukwendela mbukonyofu ubwa ndumi iji tukulumbilila!

²² ABajuuta bikulonda ifiika ukuti biitike. Aba bakaja Bajuuta bikulonda amahala.

²³ Looli uswe, tukufumusya iNdumi ijaa Kilisiti uja aafwile pa kikohekano. Ku Bajuuta, inongwa isyo bikwikinyamo, na kuli aba bakaja Bajuuta nongwa sya bukonyofu.

²⁴ Leelo kuli aba Kyala ababilikiile ukaja bandũ baake, baje Bajuuta pamo balingaja Bajuuta, Kilisiti jo maka gaa Kyala, kangĩ jo mahala agaa Kyala.

²⁵ Paapo isi abandũ bikusibona ukaja bukonyofu bwa Kyala, sikindile amahala gaa bandũ. Isi bikusibona ukaja bo boonywa bwa Kyala, maka makulumba ukukinda amaka gaa bandũ.

Ukwituufya mwa Kilisiti

²⁶ Po baamyitũ ndwitiko, mukumbukege muno mwajiiliile bo mukubilikiligwa na Kyala. Bakaali bingi pakati pamyinu abaa mahala nkyeni mmbandũ, kangĩ bakaali bingi pakati pamyinu aba baali biimikigwa, pamo ukupaapigwa nnyumba isya biimikigwa.

²⁷ Looli Kyala aabasungwile abandũ aba bikuboneka ukaja bakonyofu nkyeni mmbandũ, ukuti abasusye aba bikwibona ukaja na mahala. Kangi aabasungwile abandũ abaa paasi, ukuti abasusye abaa maka.

28 Kyala aabasungwile abafujufu abaa pakiisu, aba abandũ bikubilaamwa, aba bakaja biimikigwa, ukuti anangisye ukuti ubwimikigwa ubwa pakiisu bakaja na mbombo najimo.

29 Po akajako umundũ gwesa ugwa kwituufya nkyeni mwa Kyala.

30 Namanga Kyala jo ujũ abalungile umwe na Kilisiti Jesu. Kyala ampelile Kilisiti ukũja mahala giitu, kangĩ ukwendela mmyake atunangiisye ubugolofu bwa Kyala, atupelile ukũja biikemo,[†] atupokile.

31 Bo muno sisimbiigwe mwa Kalata uMwikemo ukuti,
 “Umundũ gwesa ujũ ikwituufya,
 iituukifyege mu Ntwa.”[‡]

2

Ukubambilila iNdũmi iNunu ijaa Jesu Kilisiti

1 Baamyitu ndwitiko, bo niisile kumyinu kukubafumukisya ulubaatiko lwa Kyala ulwa mbutiitu, ngaaliisile nu bununu ubwa masyu na mahala gangũ.

2 Bo mfikile kumyinu, naatumwile ukusita kujoba akandũ akangi, looli ukunnjoba Jesu, ukuti jo Meesija,* fiijo ukuti aafwile pa kikohekano.

3 Po bo ndi kumyinu, naali moonywa, naali nu lutende, kangĩ naatetemaga fiijo.

[†] 1:30 1:30 **Abiikemo** Bala ku Isyakulingaania. [‡] 1:31 1:31 Bala kalata gwa Jelemija 9:24. ^{*} 2:2 2:2 **Meesija** Bala ku Isyakulingaania.

4 Akabalilo ako bo ndi pakubamanyisya, ngaabombiile amasyu agaa bukomu na mahala agaa pakiisu ukuti mwitike, looli mwaliitiike paapo mwagabwene amaka agaa Mbepo Mwikemo.

5 Jo nongwa iyi ulwitiko lwinu lukaajengiigwe pamwanya pa mahala agaa bandu, looli lwa-jengiigwe pamwanya pa maka agaa Kyala.

Amahala aga gikufuma kwa Kyala

6 Looli isi tukujoba syo sya mahala, ku bandu aba bakakile ndwitiko. Amahala ago gakaja gaa pakiisu apa, kangu gakaja gaa bakulumba baa pakiisu apa, aba akabalilo kaabo kikumalika.

7 Looli amahala aga, go mahala gaa Kyala, aga gaafisiigwe ku bandu. Go aga aagabaatiike kilingaani, bo akaali ukukipela ikiisu, ukuti uswe tujenge na buliilanisi nagwe mbusisya bwake.

8 Go mahala aga, abakulumba baa pakiisu apa najumo uju agameenye. Linga baagameenye, ngali bakankomelela pa kikohekano uNtwa gwiu ugwa busisya.

9 Looli isi sifwene na isi sisimbiigwe mwa Kalata uMwikemo ukuti,
“Isi amaaso gakasibonamo siku,
pamo imbulukutu ukupilikamo,
isi umundu akiinogonamo siku,
isyo syo isi Kyala aabatendekekiisye aba banganile.”†

10 Looli uswe Kyala aatusetuliile amahala ago, ukwendela mwa Mbepo gwake. Namanga

† 2:9 2:9 Bala kalata gwa Jeosaja 64:4.

Mbepo Mwikemo asimeenye syosa, syope ni sya mbusolofu isi sili mwa Kyala.

¹¹ Namanga akajako umundu ujū abagiile ukusimanya isi ikwinogona umundu ujungi, looli sikumanyigwa na mwene. Bo sili na isi Kyala ikwinogona, akajako ujū asimeenye, looli sikumanyigwa na Mbepo gwa Kyala mwene.

¹² Po kumyitu uswe, tukaalyambiliile imbepo iji jifumile pakiisu apa, looli twambiliile Mbepo ujū ikufuma kwa Kyala, ukuti tasyaganiege isi tpeeliigwe na Kyala.

¹³ Inongwa isi tukujoba, tukamanyisigwa na bandu abaa mahala, looli tumanyisiigwe na Mbepo gwa Kyala. Tukulingaania inongwa isya Mbepo kuli aba bali nagwe Mbepo.

¹⁴ Looli umundu ujū akaja na Mbepo gwa Kyala, akabagila ukwambilila isi sikufuma kwa Mbepo. Kumyake ujo sya bukonyofu, kangi akabagila ukusyagania, paapo umundu abagiile ukusyagania isyo ku butuuli ubwa Mbepo mwene.

¹⁵ Umundu ujū ali na Mbepo Mwikemo, ujo abagiile ukupima syosa, looli abandū abangi bakabagila ukumpima umwene.

¹⁶ “Jwani asyageenie inyiinogono sya Ntwa Kyala,
ukuti anndinganie?”‡

Looli uswe twe biitiki tuli ni nyiinogono isya Kilisiti.

‡ 2:16 2:16 Bala kalata gwa Jeosaja 40:13.

3

Ubuliilanisi mu mbombo jaa Kyala

¹ Baamyitu ndwitiko, bo ndi kumyinu ngaa-jobaga na nuumwe bo muno ngujobela na bandu aba bali na Mbepo Mwikemo. Looli naajobaga na nuumwe bo muno ngujobela na bandu abaa kajiilo keene akaa pakiisu apa, pamo bo ulwa baana abafyele mwa Kilisiti.*

² Naabapaga lwene ulukama, fyomma ifindu, paapo mukaabagiile ukulya. Na ulu mukabagila.

³ Namanga mukaali muli na kajiilo akaa pakiisu. Pakati pamyinu muli na kabini kangi mukulwa. Bule, sitikunangisya ukuti mukaali muli na kajiilo akaa pakiisu? Bule, mukaja bo ulwa bandu abaa pakiisu apa?

⁴ Po linga umundu jumo ikuti, “Une ndi gwa Pauli,” ujungi ikuti, “Une ndi gwa Apolo,” bule, isyo sitikunangisya ukuti mukaali mukabomba isya bandu abaa pakiisu apa?

⁵ Leelo Apolo jo jwani? Na niine Pauli ne ani? Uswa tuli babombeli itolo, twe twabamanyiisye umwe ukummwitika Jesu Kilisiti. Uswa babili, kukuti mundu aabombile imbombo jaake, iji uNtwa Jesu aalimpeelee ukujibomba.

⁶ Une naabyele imbeju, Apolo aalyoneliile amiisi, Kyala jo uju aamesiisye na kukusya.

⁷ Po ugwa kwimikigwa jo uju ikukusya, jo Kyala, jomma uju ikubyalala pamo ikoonelela amiisi.

* **3:1 3:1 Mwa Kilisiti Jesu** Bala ku Isyakulingaania.

⁸ Uju ikubyalala na uju ikoonelela, boosa bali ni nyango jimojeene. Kaku ti mundu Kyala ik-wisa kumpa ifihombigwa, ukukongana na muno abombiile imbombo jaake.

⁹ Namanga uswe tuli babombanisi pa mbombo jaa Kyala. Umwe muli ngunda gwa Kyala, kangi muli nyumba jaake.

¹⁰ Ukwendela nkikungilwa iki Kyala aalimbeelee, naajengile ulwalo bo muno ikubombela unjenga nyumba ununu, ugwa mahala. Leelo uju ikujenga pamwanya pa lwalo ulo, jangi. Looli umundu gwesa akeetege kanunu bo ikujenga pamwanya pa lwalo ulo.

¹¹ Namanga akajako umundu uju abagiile ukujenga ulwalo ulangi pa lwalo ulo, ulu jo Jesu Kilisiti jujo.

¹² Po pamwanya pa lwalo ulo, abandu bamo bikujenga ni sahabu, pamo ifeesa, pamo amabwe agaa ntengo unnywamu. Abangi bikujenga ni mipiki, pamo ni liisu.

¹³ Po imbombo isya bandu boosa sikwisa kubonekaga muno sijiiliile. Pi isiku lya bulongi imbombo syosa sikwisa kuja pabwelu, ni mbombo syosa isya bandu boosa sikwisa kugeligwa nu mooto ugwa bulongi, ukuti sili buleebule.

¹⁴ Linga imbombo jaa mundu jikwisa kupona, umundu ujo ikwisa kwambilila ifihombigwa.

¹⁵ Looli linga imbombo jaa mundu jikwisa kupya, po ikwisa kusobesya fyosa. Nalooli ikwisa kupokigwa, leelo aikuja bo ulwa mundu uju aponile mmooto.

¹⁶ Bule, mukamanya ukuti umwe muli tempeli

jaa Kyala? Mukamanya ukuti Mbepo gwa Kyala ikutuugala nkati mmyinu?

¹⁷ Linga umundu ikoonanga itempeli jaa Kyala, Kyala ikwisa kummoonanga umundu ujo. Namanga itempeli jaa Kyala nyiikemo, inyumba ijo jo umwe.

¹⁸ Mulingiisyobaga. Umundu linga ikwibona ukuti ali na mahala pakiisu apa, iibiikege ukuja nkonyofu ukuti akabe amahala agaa nalooli.

¹⁹ Namanga amahala gaa pakiisu apa, bukonyofu itolo nkyeni mwa Kyala. Bo muno sisimbiigwe mwa Kalata uMwikemo ukuti, “Kyala ikubakolela mbukomu bwabo abaa mahala.”†

²⁰ Kangi ukuti, “Untwa asimeenye inyiinogono isya baa mahala ukuja sya itolo.”‡

²¹ Po mundu gwesa alingiituukifyaga undongosi gwake. Paapo fyosa fyinu,

²² nje jo une Pauli, aje jo Apolo, aje jo Peeteli, fije fya pakiisu, pamo ubuumi, pamo ubufwe, fije fya kabalilo aka, pamo fya kabalilo aka kikwisa. Fyosa fyinu,

²³ kangi umwe muli bandu baa Kilisiti, joope Kilisiti gwa Kyala.

4

Imbombo jaa Batumigwa

¹ Abandu batumanyege ukuti uswe tuli babombeli baa Kilisiti, tupeeliigwe imbombo

† 3:19 3:19 Bala kalata gwa Jobu 5:13. ‡ 3:20 3:20 Bala kalata gwa Isabuli 94:11.

ijaa kwimilila ukufumusya indumi jaa Kyala ijaa mbutiitu.

² Po umundu uju apeeliigwe ukwimilila, fikuti ajege nsuubiligwa ku ntwake.

³ Looli kumyangu une, kandu kaa itolo linga ngulongigwa na nuumwe, pamo nu bulongosi ubwa bandu abangi. Kangi na niine ndikwilinga.

⁴ Ndikwibona ukuti nsobile simo, looli ilyo litikumbiika ukuja nsita nongwa. Untwa Jesu jo uju ikulamula.

⁵ Po leelo mulingabalongaga abandu bo akabalilo kakaali ukufika, looli muguulilege mpaka pi isiku ili untwa Jesu ikwisa. Umwene jo uju ikwisa kusibiika pabwelu syosa isi sifisiigwe mu ngiisi, nu kusinangisya isi sili mu ndumbula isya bandu. Akabalilo ako, aba babagiisye boosa bikwisa kwambilila induufyo ukufuma kwa Kyala.

⁶ Baamyitu ndwitiko, kunongwa jinu njobile inongwa syosa isyo, isyangu ni sya Apolo, ukuja sya kukeetelamo umwe. Po musimanye isi sikuti, "Mulingongelangapo pali isi sisimbiigwe mwa Kalata umwikemo." Linga mukusikonga, mutikujaga bandu aba bikwituukifya ummanyisi jumo nu kummwilaamwa ujungi.

⁷ Bule, jwani akubiikile ugwe ukuti ubagiisye fijo ukunkinda unnino? Kandu nki aka uli nako aka ukapeeligwa na Kyala? Looli linga upeeliigwe, fiki kwituukifya ngati ukaapeeliigwe?

⁸ Po mwikwite! Muli bakabi! Muli banyafyale! Mukaatulondilepo uswe ukubatula! Kwali

kununu linga mwali banyafyale nalooli, ukuti na nuuswe talongosyege pamopeene na nuumwe!

⁹ Looli kumyitu uswe twe batumigwa,* ngwaga Kyala atubiikile ukuti abandu batwilaamwege ukukinda boosa. Tuli bo abandu aba balongiigwe kukugogigwa pabwelu pakiisu, nkyeni mbandumi na bandu.

¹⁰ Abandu bikutubona uswe ukuja bakonyofu, apa tukubomba imbombo jaa Kilisiti. Looli umwe muli na mahala mwa Kilisiti! Uswe tuli boonywa, looli umwe muli na maka! Uswe abandu bikutwilaamwa, looli umwe abandu bikubiimika fiijo!

¹¹ Na ulu tuli ni njala ni kyumilwa, imyenda tukaja ngyo, tukutaamigwa, tukaja nu bujo.

¹² Tukwijuula ukubomba imbombo na maboko giitu. Apa abandu bikututuka, tukubasaja, apa bikutupa ingubilo, tukuumiilila,

¹³ apa bikutujoba kabiibi, tukubaamula kanunu. Na ulu, abandu abaa pakiisu apa bikutubona bo ulwa kiko, ni mitindibofu.

¹⁴ Ndikubasimbila inongwa isi ukubasuusya, looli ngulonda ukubasoka bo ulwa baanangu abakundwe.

¹⁵ Namanga muli na baswili abingi mwa Kilisiti, looli muli nu gwiseemwe jumojwene itolo, paapo une naali gwiseemwe mwa Kilisiti Jesu bo ngubalumbilila iNdumi iNunu.

¹⁶ Po ngubapyelesya mukongege bo muno ngubombela une.

¹⁷ Jo nongwa iji naalintumile Timoti kumyinu, umwanangu unkundwe, uju ngunsuubila mu

* **4:9 4:9 Abatumigwa** Bala ku Isyakulingaania.

mbombo ijaa Ntwa. Umwene ikubakumbusya muno njiiliile mwa Kilisiti Jesu, na muno ngumanyikisya abiitiki boosa mbujo boosa.

¹⁸ Po abandũ bamo pakati pamyinu bali na matingo, bikwinogona ukuti ndikwisako kukubajaatila.

¹⁹ Looli linga uNtwa iiganile, ngwandana ukufika kamyinu. Apo po angwisa kwikeetela amaka gaabo abaa matingo, somma amasyu gaabo geene.

²⁰ Paapo uBunyafyale bwa Kyala gakaja masyu geene, looli maka.

²¹ Po mukulonda mbombe ifiki? Bule, niise ni ngili? Pamo niise ndugano na mbooloolo?

5

Pauli ikukemela ubulogwe ku biitiki

¹ Sifumwike inongwa ukuti, kamyinu buliko ubulogwe. Kuli nu mundu uju ikwenda nu nkasi ugwa gwise. Syope ni ndagilo isya bapanja, aba bakammanya Kyala, sitikwitikisya isyo!

² Keeta umwe mukwituufya! Bule, mutikulondigwa ukusulumania fiijo? Bule, mutikulondigwa ukunsoosyapo pakati pamyinu, umundu uju ikubomba isyo?

³ Na paapo une ndi kubutali, indumbula jangu jili pamopeene na nuumwe. Po nsitumuliile ngaani inongwa isya mundu ujo, uju abombile sisiisyo, ngufwana ngati ndiko kamyinu.

⁴ Bo mubungeene mu ngamu jaa Jesu uNtwa gwitu, ndi pamopeene na nuumwe mu ndumbula, nu bulagili ubwa Jesu bulipo.

⁵ Apo umundu ujo munndekele Seetano, ukuti ataamigwe, ubundu bwake ubwa butulanongwa busookemo, ukuti joope iise apokigwe pi isiku lya kwisa uNtwa Jesu.

⁶ Ukwituufya kwinu kukaja kununu. Bale, mukamanya ukuti, “Unkese unnandi itolo gukutupisya ikikando kyosa”?

⁷ Po mugusoosyege unkese ugwa kabalilo aka kakindile, ukuti muje beelu. Mujege bo ikikando ikipya iki kikaja nu nkese gogoosa,* paapo mo muno mujiiliile. Kilisiti, uju jo Kang’oosi gwitu ugwa Pasa,† abooliigwe ukaja ikemo.

⁸ Po tulingasekelaga ikyaka kya Pasa ku nkese gula ugwa ijolo, ugu gukutupisya ububiibi ubwa butulanongwa, looli tumogege bo tukulya ifi fikaja nu nkese, kokuti indumbula inyeelu nu bwanalooli.

⁹ Mwa kalata uju naabasimbiile, naababulile ukuti muleke ukaja nu buliilanisi na balogwe.

¹⁰ Kukaja kokuti muleke loosa ukaja nu buliilanisi na balogwe aba bakaja bandu baa Kyala, pamo abanyonywa toosa, pamo abanyambuta, pamo aba bikwipuuta ku tundu

* **5:7 5:7** *Ikikando ikipya iki kikaja nu nkese gogoosa* ABanyaisilaili bo bali mbutumwa kula ku Misili, bakaabiikilemo unkese nkikando ikya fisyese fyabo, ukuti basookemo mbimbibi mbutumwa bwabo. Bala kalata gwa Ukusooka 13:7. † **5:7 5:7** *Kang’oosi gwitu ugwa Pasa* ABanyaisilaili bo bali mbutumwa kula ku Misili, baaboolile utung’oosi, baapakile ilopa mu nyiigi syabo, ukuti ugwandumi ugwa Kyala alingabagoga. Bala kalata gwa Ukusooka 12:21-23. Jesu aafwene bo ulwa kang’oosi jula. Bala amasyu **Kang’oosi** na **IPasa** ku Isyakulingaania.

utu akaja jo Kyala, paapo ukubomba bo ulo mwalondigwaga ukusookapo pakiisu apa!

¹¹ Looli isi ngalonda ukujoba kokuti muleke ukaja nu buliilanisi nu mundu gwesa uju ikwibiika ukaja mwitiki mwiniinu, looli ngimba ndogwe, nnyonywa toosa, gwa luheeho, ngaala bwalwa, nnyambuta, pamo uju ikwipuuta ku tandu utu akaja jo Kyala. Umundu bo ujo muleke nu kulya nagwe.

¹²⁻¹³ Po leelo, jikaja mbombo jangu ukubalanga abandu aba bakaja biitiki, looli Kyala jujo jo ikwisa kubalanga. Looli umwe mukulondigwa ukubalanga abiitiki, bo ulu sisimbiigwe mwa Kalata uMwikemo ukuti, “Umundu ambiibi pakati pamyinu munkagege.”[‡]

6

Ukulongana abiitiki

¹ Linga jumo pakati pamyinu ali ni nongwa nu mwitiki nnine, alingasulwa ukujitwala inongwa jaake kukulonga kuli aba bakaja biitiki. Bule, kukaja kununu ukujitwala kukulonga ku biitiki biinaake?

² Mukamanya ukuti abiitiki bo aba bikwisa kukilonga ikiisu? Po linga mukwisa kukilonga ikiisu, bule, mukwinogona ukuti mukabagisya ukulonga utunongwa utunandi utu?

³ Mukamanya ukuti tukwisa kubalanga abandumi baa Seetano? Po nalooli mubagiile ukulonga inongwa isya mbuumi bwinu!

[‡] 5:12-13 5:12-13 Bala kalata gwa Ukukumbuka Ingomeelesyo 17:7.

⁴ Kangi linga muli ni nongwa mbuuni bwinu, mungasitwalaga inongwa syinu ku bandu aba bakaja biitiki, paapo abo batikwimikigwa nkipanga kya Kyala.

⁵ Mbalaalusye simo isya kubasusya. Bule, kumyinu akajako umundu najamo ugwa mahala, uju abagiisye ukulamula inongwa isya biitiki?

⁶ Looli umwe, muli na kajiilo akaa mundu ukunsitaaka umwitiki nnine! Kangi mukubomba bo ulu nkyeni mmbandwa aba bakaja biitiki!

⁷ Po ukusitaakana uko kukunangisya ukuti mutoliigwe loosa! Ngimba, po kwali kununu umundu ukubabombela kabiibi na kupoka ikyuma kyinu!

⁸ Looli umwe, mukusyoba na kupoka ikyuma, mukubabombela isyo boope na biitiki biiniinu!

⁹ Mukamanya ukuti abatulanongwa batikwisa kwingila mBunyaafyale bwa Kyala? Mulingiisyobaga! Abalogwe, abandwa aba bikwipuuta ku tundu utu akaja jo Kyala, boope abanyambala aba bikulogwa na banyambala,

¹⁰ abahiji, abanyonywa toosa, abagaala bwalwa, abaa luheeho, abanyambuta, abo boosa batikwisa kwingila mBunyaafyale bwa Kyala.

¹¹ Akabalilo kamo bamo pakati pamyinu mwali bo ulu. Looli lilino, mu ngamu jaa Ntwa gwitw Jesu Kilisiti, na mwa Mbepo ugwa Kyala gwitw, umwe mwelusiigwe ububiibi bwinu, umwe

* **6:9 6:9 UBunyaafyale bwa Kyala** Bala ku Isyakulingaania.

musunguliigwe ukujja bandu baake, umwe mubaliigwe ubugolofu.

Ukubombela imibili ukuntuufya Kyala

¹² Bamo pakati pamyinu bikuti, “Tuli baabuke ukubomba syosa isi tukulonda,” leelo une Pauli nguti, sikaja syosa nunu kumyitu. Nalinga mukuti, “Tuli baabuke ukubomba syosa isi tukulonda,” looli une ndikujja ntumwa gwa kandu kokoosa.[†]

¹³ Bamo pakati pamyinu bikuti, “Ifindu fikukinda itolo ndwanda, nu lwanda lwa findu itolo. Kyala ikwisa kufipyuta fyofibili.” Mukujoba bo uho, leelo Kyala akaagipelile imibili gyitu ukujja gya bulogwe, looli aagipelile ukujja gya kumbombela uNtwa, joope uNtwa ikugipaasya.

¹⁴ Kyala aalinsyusiisye uNtwa Jesu ukufuma mbufwe ku maka gaake. Kangi bubuho ikwisa kugisyusya imibili gyitu uswe.

¹⁵ Mukamanya ukuti imibili gyinu tumbakaasya utwa mbili gwa Kilisiti? Bule, ubagiile ukwega utumbakaasya utwa mbili gwa Kilisiti nu kutulunga ku mbili ugwa ndogwe? Himma na panandi!

¹⁶ Mukamanya ukuti umundu gwesa uju ikulungana nu ndogwe ikujja mbili gumogwene nagwe? Namanga sisimbiigwe mwa Kalata uMwikemo ukuti, “Bobabili bikujaga mbili gumogwene.”[‡]

[†] **6:12 6:12** *Untumwa gwa kandu kokoosa* Bala iisya **Untumwa** ku Isyakulingaania. [‡] **6:16 6:16** Bala kalata gwa Ubwandilo 2:24.

¹⁷ Looli umundu gwesa uju ikulungana na Ntwa, ikujaga jumojuwene nagwe mwa Mbepo Mwikemo.

¹⁸ Mubwepukege fiijo ubulogwe. Mukuti, “Ubutulanongwa boosa ubu umundu ikububomba, bali panja pa mbili gwake,” looli une nguti, umundu uju ikulogwa, ikugabombela ubutulanongwa umbili gwake juujo.

¹⁹ Mukamanya ukuti imibili gyinu jo tempeli ijaa kutugalamo Mbepo Mwikemo, uju Kyala aabapeele? Po imibili igyo gikaja kyama kyinu,

²⁰ paapo Kyala abulile ku ntengo unnywamu. Po muntuufyege Kyala mmibili gyinu.

7

Isya bwegi

¹ Kuli isi mwaliisimbiile ukuti, “Kununu unnyambala ukusita kwegu unkiikulu.”

² Looli kunongwa jaa kubwepuka ubulogwe, kanunu kukuti nnyambala ajege na nkasi gwake, na kukuti nkiikulu ajege na ndume gwake.

³ Unnyambala ammbombelege unkasi isi sikulondigwa ku beegi, joope unkiikulu amm-bombelege undume isi sikulondigwa ku beegi.

⁴ Umbili gwa nkiikulu gukaja gwake, looli gwa ndume. Kangi umbili gwa nnyambala gukaja gwake, looli gwa nkasi.

⁵ Mungakaananga, looli linga mwitikeene ukusita kubomba kukabalilo akanandi itolo, ukuti mukaage akabalilo akanunu akaa kwipu-uta. Piitaasi mugomokelanilege kangu, ukuti See-tano alingiisa kubagela kunongwa jaa kutoligwa ukwitiima.

⁶ Isi mbabuulile, mbiitikiisye itolo, looli ndikubalagila ukubomba bo ulo.

⁷ Looli une naaliiganile ukuti abandũ boosa bajege bo une.* Leelo sikaja bo ulo, namanga kukuti mundũ Kyala ampeelee ikikungilwa kyake, jũmo ikikungilwa iki, ujungi ampeelee ikikungilwa ikingi.

⁸ Po ngubabũla abakenja, na bakiikulu abafwile, ukuti kununu ukusyala bubũbo bo muno njiiliile une.

⁹ Looli linga bikutoligwa ukũumiilila ukũja bo ulo, po kununu ukwega pamo ukwegigwa, paapo kununupo ukubomba bo ulo, ukũkinda ukũpya ni finyonyo ifya mbili.

¹⁰ Kuli aba beegeene, ngubapa ululagilo ulũ. Lutikufuma mu nyinogono syangu, looli iisya ili aajobile uNtwa Jesu jujo. Unkiikulu alingalekanaga nu ndume!

¹¹ Looli linga alekeene nagwe, alingeegigwaga kubungi, pamo po agomokelege ku ndume. Kangi unnyambala alinganndekaga unkasi.

¹² Ku biitiki abangi, likajapo ili aajobile uNtwa Jesu, looli une nguti, linga unnyambala umwitiki eegile unkiikulu uju akaja mwitiki, linga unkiikulu ujo ikwitika ukutuugala nagwe, alinganndekaga.

¹³ Joope unkiikulu umwitiki, linga eegiigwe nu nnyambala uju akaja mwitiki, linga unnyambala ujo ikwitika ukutuugala nagwe, alingalekanaga nagwe.

* **7:7 7:7** Bajege bo une Apa Pauli iijobaga ukuti umwene akaali mwegi, kangi ikyo kyali kikungilwa kyake iki Kyala aalimpeelee.

14 Namanga undume uju akaja mwitiki, Kyala ammbiikile ukaja mmbandũ baake, kunongwa jaa kaja nu nkasi umwitiki. Nu nkiikulũ uju akaja mwitiki, Kyala ammbiikile ukaja mmbandũ baake, kunongwa jaa kaja nu ndume umwitiki. Linga sikaali bo ulo, abaaniinu ngali bakaja baa Kyala, looli ngimba abeene baa Kyala.

15 Looli linga umundũ uju akaja mwitiki ikulonda ukulekana nu mwitiki uju baalyegeene, nndeke abombe bo ulo. Apo umwitiki atikupinyigwa mbwegi ubo. Looli Kyala ababilikiile ukuti mutugalege nu lutengaano.

16 Gwe nkiikulũ ugwe, ukabagila ukumanya! Lũmo undumego abagiile ukupokigwa kunongwa jaako. Na ugwe gwe nnyambala, ukabagila ukumanya! Lũmo unkasigo abagiile ukupokigwa kunongwa jaako.

Kukuti mundũ asyalege bo muno aajiiliile

17 Abandũ boosa batugalege bo muno uNtwa Jesu aababiikiile, kangĩ basyalege bo muno baajiiliile bo Kyala ikubabilikila. Po ulũ lo lulagilo lwangu ku fipanga fya Kyala fyosa.

18 Linga gwali Njuuta bo Kyala ikukubilikila, ujege bubũbo. Kangĩ linga ukaali Njuuta bo Kyala ikukubilikila, ulingalondaga ukaja Njuuta uju abuutiigwe kukyeni.†

† 7:18 7:18 ABajuuta baali nu lwiho ulwa kubabuuta kukyeni abaanaabo. Aba bakaja Bajuuta bakaali nu lwiho ulo. Po Pauli ikumanyisya ukuti aBakilisiti aba babuutiigwe balingiifisaga ukaja Bajuuta, kangĩ aBakilisiti aba bakaja Bajuuta balingabuutigwaga kukyeni.

19 Ukubuutigwa kukyeni, pamo ukusita kubuutigwa kukyeni, kukaja ni fya kukabamo, looli ukusikola indagilo isya Kyala.

20 Po kukuti mundu asyalege bo muno aajiliile bo Kyala ikummbilikila.

21 Linga gwali ntumwa bo Kyala ikukubilikila, ulingapaasyaga. Linga kajaaga injila ijaa kaja mwabuke, jibombebe.

22 Paapo umundu uju aali ntumwa bo ikubilikiligwa na Ntwa, ujo mwabuke ku Ntwa. Joope uju aali mwabuke bo ikubilikiligwa, ujo ntumwa gwa Kilisiti.

23 Mwalyuliigwe ku ntengo unnywamu. Po mulingajaga batumwa baa bandu.

24 Baamyitu ndwitiko, kukuti mundu asyalege bo muno aajiliile bo ikubilikiligwa na Kyala.

Isya kubasoka abakenja na bafwile

25 Po ngwamula isi mulaalusisiye, isya balindwana abakenja. Ngaja na lalagilo ukufuma ku Ntwa. Looli nikubalingania ku nyiinogono syangu, une ne nsuubiligwa kwi ipyana lya Kyala.

26 Paapo kuli ni ngubilo amasiku aga, ngwinogona ukuti umundu asyalege bo muno aajiliile.

27 Bule, ukabile unkiikulu? Ulingalondaga ukulekana nagwe. Ugwe ukaja mwegi? Ulingalondaga ukaja mwegi.

28 Leelo linga gwegile unkiikulu, ukatula inongwa. Kangi linga undindwana eegiigwe, akatula inongwa. Leelo abeegi bikuja na butolwe ubwa luko lwingi. Ngulonda ukubasoka ukuti ubutolwe bungisa kubaaga.

29 Baamyitu ndwitiko, isi ngujoba syo isi, akabalilo aka tuli nako mbuumi bwitu kanandi itolo. Po akabalilo aka kasyele kumyitu, abeegi baleke ukwinogona fiijo isya butolwe ubwa bwegi bwabo.

30 Boope aba bikulila, batugalege ngati bakaja nu tundu utwa kubalisya. Boope aba bahobwike, batugalege ngati bakaja nu tundu utwa kubahobosya. Boope aba bikula utundu, batugalege ngati bakaja nu tundu utwa kukola.

31 Aba bikubombela utundu utwa pakiisu apa, balingatwinogonaga fiijo utundu uto. Paapo utundu toosa utwa pakiisu apa tukwisa kukinda.

32 Po ngulonda ukuti mulingapaasyaga isya pakiisu apa. Unnyambala uju akaja nu nkiikulu, abagiile ukubomba isya Ntwa kisita kuja ni sya kwijaaja, ikwinogona muno abagiile ukunkyela uNtwa.

33 Looli unnyambala uju ali nu nkiikulu, ali ni sya kwijaaja nyingi, ikwinogona muno abagiile ukunkyela unkasi,

34 ni nyiinogono syake sikuja ni fibafu fibili. Joope unkiikulu unkenja, abagiile ukubomba isya Ntwa kisita kuja ni sya kwijaaja, ikwinogona isya kuja ngolofu mu mbili gwake na mu ndumbula jaake. Looli unkiikulu uju ali nu nnyambala, ali ni sya kwijaaja nyingi, ikwinogona muno abagiile ukunkyela undume.

35 Amasyu aga ngubabula kukaja kokuti ngulonda ukubakunga, looli ngulonda ukubabula. Ngulonda mutugalege na kajilo aka kabagiisye, mummbombelege uNtwa kisita kwijaaja.

³⁶ Linga umundu jumo ikwaga atikubomba kanunu ku mwanaake undindwana, paapo ikunkaanisya ukwegigwa, kangi ifyinja fyake ifya kwegigwa fikukinda, umundu ujo linga ikwaga sikulondigwa eegigwe, po ammwitikisye ukwegigwa. Apo bo akatula inongwa.

³⁷ Linga unnyambala ujungi atumwile juuho ku bwigane bwake ukuti umwanaake alingeegigwa, linga akafimbilisigwa ukubomba bo uho, kangi linga ikulonda ukunndindilila umwanaake, po alingammwitikisya ukwegigwa. Unnyambala ujo joope ikubomba kanunu.

³⁸ Po uju ikummwitikisya umwanaake ukwegigwa ikubomba kanunu. Joope uju atikummwitikisya ikubomba kanunu ukukindapo.

³⁹ Po unkiikulu atugalege nu ndume akabalilo koosa aka ali ku buumi. Looli linga undume afwile, apo ikuja mwabuke ukwegigwa nu munda gwesa uju ikunndonda, looli undume ujo ajepe mwitiki gwa Ntwa.

⁴⁰ Leelo mu nyinogono syangu paakipo umfwile ujo asyale kisita kwegigwa. Ngwinogona ukuti na niine Mbepo gwa Kyala ikundongosya ukujoba inongwa isyo.

8

Isya findu ifi fikusoosigwa nkwipuuta ku fifwani

¹ Mwaliindaaluuusiisye inongwa isya findu ifi bikusoosya bo bikwipuuta ku fifwani.* Mmeenye mukujoba mukuti, “Uswe twesa tuli bamanyi.” Sya nalooli, leelo ubumanyi bukubapela abandu ukuya na matingo. Looli ulugano lo ulu lukubakasya abandu ndwitiko.

² Linga umundu ikwibona ukuti asimeenye simo, ujo akamanya muno ikulondeligwa ukusyagania.

³ Looli umundu uju annganile Kyala, ujo jo uju ikumanyigwa na Kyala juuho.

⁴ Po isya kulya inyama isi bafisookiisye ififwani, uswe twesa tumeenye bo ulu mukujoba ukuti, “Utundu utu tukwipuutigwa na bandu tukaja na mbombo najimo pakiisu apa.” Kangi tumeenye ukuti, “Aliko Kyala jumojwene itolo.”†

⁵ Sya nalooli ukuti tuliko utundu utu abandu bikutujoba ukuya bo baakyala, kuje ko ku mpaalanga, pamo pakiisu. Nalooli utundu utu abandu bikuti bo baakyala twingi, na utu abandu bikuti batwa twingi,

⁶ looli kumyitu uswe,
Aliko Kyala jumojwene itolo, jo Taata,
jo uju aapelile utundu toosa,
jo uju uswe tukutugala mmyake.
Aliko uNtwa jumojwene itolo, jo Jesu Kilisiti,
jo uju utundu toosa tupeliigwe ukwendela
mmyake,

* **8:1 8:1** *Ifindu ifi bikusoosya bo bikwipuuta ku fifwani* Nkabalilo kala, lwali lwiho lwa kiisu ikyo ukuboola ifinyamaana ku fifwani ifya gyabaakyala, nu kutwala inyama ku sokoni kukualisya.

† **8:4 8:4** Bala kalata gwa Ukukumbuka Ingomeelesyo 6:4.

jo ujū ukwendela mmyake tuli nū būumi.

⁷ Looli kũkaja kokuti abiitiki boosa basimeenye kanunu inongwa isi. Balipo abandũ aba baali-isibiile fiijo ulwiho ulwa kwipuuta kũ fifwani. Akabalilo aka bo bikũya inyama, bakaali bik-winogona ukuti inyama isyo mwiko, paapo bafisookiisye ififwani. Po mu ndumbula syabo inyoonywa bikutaamigwa fiijo, bikwibona ukũja banyali.‡

⁸ Looli ifindũ fitikutubũika kifuki na Kyala. Linga tukũfileka ukũya, tutikwagilwa nafimo. Kangi linga tukũya, tutikongeleligwa nafimo.

⁹ Po ulo mwikeetege kanunu, ubwabũke bwinu balingajaga bwa kubasobesya abiitiki abaa ndumbula inyoonywa.

¹⁰ Paapo umwitiki ugwa ndumbula inyoonywa, abagiile ukũkũbona ugwe gwe kwibona ukuti usyageenie, uli nnyumba ijaa kwipuutilamo kũ fifwani, kũya inyama. Bũle, mu ndumbula jaake atikwinogona ukuti joope abagiisye ukũya inyama isi sisoosiigwe kũ fifwani? Bũle, atikwi-bonaga ukuti ikũfiipuuta?

¹¹ Kuli ilyo, unnino umoonywa, ujũ Kilisiti aalimfwiliile, ikusobesigwa, paapo kwinogona ukuti uli mmanyi.

¹² Po apa mukutula inongwa kũ baamyinu ndwitiko, nũ kubafulasya indumbula syabo

‡ **8:7 8:7** Abakũmba nkipanga kya Kyala baabasofyaga abandũ ukũya, paapo biinogonaga ukuti, ukũya inyama isi sisoosiigwe kwa gyabaakyala kũkaja mwiko kũ biitiki, paapo gyabaakyala gikaja na mbombo najimo. Looli abandũ abaa paasi nkipanga kya Kyala, biinogonaga ukuti gyabaakyala gikaali gili na maka, baatiilaga fiijo ukũya inyama isyo.

inyoonywa. Ukubomba bo ulo, mukutula inongwa kwa Kilisiti juujo.

¹³ Po linga ifindu ifi ngulya, fikunsobesya ndwitiko umwitiki mwinangu, apo ndikwisa kulyamo siku inyama, ukuti umwinangu alingasoba.

9

Ubulagili ni mbombo sya batumigwa

¹ Bule, une ngaja mwabuke? Bule, une ngaja ntumigwa? Bule, une ngaalimmbwene uNtwa gwitw Jesu? Bule, ngaja jo une naalyandiisye ikipanga kyinu ikya Kyala ku maka agaa Ntwa Jesu?

² Nalinga abandu abangi bikumbona ukuti ngaja ntumigwa, looli kumyinu une ndi ntumigwa, paapo ikipanga kyinu ikya Kyala, kimanyilo iki kikanangisya ukuti une ndumiigwe na Ntwa.

³ Po abandu aba bikusitaaka une ukuti ngaja ntumigwa, nikubabwula nikuti,

⁴ baati, uswe twe batumigwa baa Kyala, tukabagisya ukupeeligwa ifya kulya ni fya kunwa kunongwa jaa mbombo iji?

⁵ Bule, tukabagisya ukwenda injila na bakasi biitu abiitiki, bo ulu bikwenda nabo injila Peeteli na batumigwa abangi, na banuguna baa Ntwa Jesu?

⁶ Baati, jo une na Balinaba twibeene, twe tukulondigwa ukubomba imbombo ijingi ukuti tukabe umfwalo?

⁷ Jo nsikali nki uju ikubuka kukulwa ubwite, ikwihomba icyuma kyake? Jo jwani uju ikubyaala mu ngunda gwake, looli atikusubila ukulya ifi aabyele? Kangi jo jwani uju ikutiima antiimo kisita kunwamo ukukama mu ntiimo gwake?

⁸ Inyiinogono isi sya bandu itolo. Looli ni ndagilo sya Moose sikulingaania bo luluulo.

⁹ Sisimbiigwe umu ukuti, “Ulingajipinyaga ing’ombe ku kanwa, bo jili pakupwula inganu.”* Nkifwanikisyo iki, bwe, Kyala ikupaasya syene isya ng’ombe?

¹⁰ Himma! Bwe, akaajobile isyo kumyitu? Bo sili! Namanga uju ikulima ungunda, na uju ikutondola mu ngunda gula, boosa bikusubila ukuti bikufyaga ifya kujabana.

¹¹ Uwe tulumbiliile iNdumi iNunu kumyinu, bo ulwa mundu uju ikubyaala imbeju. Bwe, ko kukulumba ukusubila utundu ukufuma kumyinu, utwa kututwula mu mbili, bo ulwa mundu uju ikutondola?

Pauli ikukaana ukwambilila ifya kuntwula

¹² Linga abangi babagiisye ukapeeligwa utundu ukufuma kumyinu, bwe, uwe tukabagisya ukukindapo ukukaba?

Looli uwe tukaamelile ifi tubagiisye ukubombeligwa na nuumwe, leelo tulinkwikasya ndi syosa ukuti tulingabasigila aband ukwitika iNdumi iNunu ijaa Kilisiti.

* **9:9 9:9** Bala kalata gwa Ukukumbuka Ingomeelesyo 25:4. Ubajobi ubu kokuti *Ing’ombe jibagiile ukulya inganu bo jili pakupwula, ugo go mfwalo gwa mbombo jaake.*

¹³ Bule, mukamanya ukuti aba bikubomba imbombo mu tempeli bikukaba ifindu fyabo ukufuma mwi ikemo ili bikutwala mu tempeli? Kokuti mukamanya ukuti aba bikubomba imbombo pa kigemo, bikwambilila ifindu fyabo ukufuma mwi ikemo ilya pa kigemo?

¹⁴ Kangi uNtwa Jesu alagiile bubuho ukuti, aba bikulumbilila iNdumi iNunu bikulyaga ukufuma mu mbombo ijo.[†]

¹⁵ Looli une ngasuumamo nafimo ndi ifyo ifi mbagiisye ukupeeligwa. Kangi ndikubasimbila ukuti mumbepo ifyo. Kamyangu paakipo ukufwa, ukukinda umundu ukusigila ukwituufya ukulumbilila iNdumi iNunu kisita kuhombigwa.

¹⁶ Une ngabagisya ukwituufya kunongwa jaa kulumbilila iNdumi iNunu, namanga ijo jo mbombo iji mpaka njibombe, paapo Kyala aandagiile ukujibomba. Kangi ahiili kamyangu, linga ndikulumbilila iNdumi iNunu ijo!

¹⁷ Linga naabombaga imbombo iji ku bwigane bwangu, ngali ngusubila ifya kuhombigwa. Looli linga jo Kyala uju ambeelee imbombo iji ku bwigane bwake, bukaja bwigane bwangu,

¹⁸ po ifihombigwa fyangu fyo filiku? Ifihombigwa fyangu ko kubapa abandu iNdumi iNunu kisita kuhombigwa, kisita kumela ifi mbagiisye ukupeeligwa, kunongwa jaa mbombo iji.

[†] **9:14 9:14** Jesu aajobile ukuti, “Umbombeli ikulondigwa ukupeeligwa ifi afumbilwe na bandu aba ikubabombela.” Bala kalata gwa Matai 10:10.

Isi abatumigwa bikulondigwa ukubomba

¹⁹ Une ngaja ntumwa gwa mundu, ndi mwabuke, looli niibiikile ukujja ntumwa gwa bandu boosa, ukuti mbatwale abandu abingi kwa Kilisiti.

²⁰ Ku Bajuuta naabombaga ulwa Bajuuta, ukuti mbatwale aBajuuta kwa Kilisiti. Kuli bala bikusikonga indagilo syabo, naali bo ulwa aba bikusikonga, nalinga ngaja ntumwa gwa ndagilo syabo, ukuti mbatwale aba bikusikonga indagilo isyo kwa Kilisiti.

²¹ Kangi kuli bala bakasimanya indagilo sya Bajuuta, naali bo ulwa mundu ujja akasimanya indagilo isyo, ukuti mbatwale kwa Kilisiti. Sitikunangisya ukuti ngaja ni ndagilo nkyeni mwa Kyala, looli ndi nasyo paapo ngusikonga indagilo sya Kilisiti.

²² Ku bandu aboonywa, niibiikile ukujja moonywa, ukuti mbatwale kwa Kilisiti. Ku bandu boosa niipelile ukujja mwinaabo, ukuti ku njila syosa mbapoke bamo.

²³ Ngubomba isi syosa kunongwa jaa Ndumi iNunu, ukuti nje ndiilanisi na bangi isajo syake.

²⁴ Abandu bo bikutolana ukubopa ulubilo, boosa ukubopa. Bule, mukamanya ukuti jamojwene jo ujja ikutola? Liilino muboape fijo ukuti mutole.

²⁵ Aba bikutolana mu ngino, bikwitiima fijo nu kwitendekesya imibili gyabo, ukuti batole. Ujja ikutola, ikwambilila ingiga iji jikoonangika. Looli uswe tukubomba bo ulu, ukuti twambilile ingiga iji jitikoonangika siku.

26 Bububu na niine ndikubopa bo ulwa mundu uju ikubopa kisita nyango, kangi ndikulwa bo ulwa mundu uju ikukoma itolo ikibuli mu mpaalanga.

27 Looli ngugutaamya nu kugwisibisya umbili gwangu ukwitiima, ukuti bo mbalumbiliile abandu abangi iNdumi iNunu, ndingiisa kukaanigwa na Kyala.

10

Isi sikunkalasya Kyala

1 Baamyitu ndwitiko, ngiigana ukuti mulingasyagania isya biisukulu biitu bo bikwenda ndungalangala, ukuti boosa baalongosigwaga ni ibingo, kangi boosa baalyendile pakati pa Nyanja iNgeseefu.*

2 Ukulongosigwa ni ibingo, nu kwenda mu nyanja, kumyabo kwali bo ukoosigwa, ukuja baa kunkonga Moose.

3 Akabalilo kala, boosa baalyaga ifindu ifya luko lumolwene, ifi fyafumile kwa Kyala.†

4 Kangi boosa baanwaga amiisi agaa luko lumolwene, aga gaafumile kwa Kyala. Baanwaga amiisi ukufuma ndwalabwe ulu lwafumile kwa Kyala.‡ Ulwalabwe ulu lwalongosaniaga nabo, paapo ulwalabwe ulu, aali jo Kilisiti juujo.

* **10:1 10:1** Bo babopile ukufuma ku Misili, Kyala aabalongwisye ni ibingo, baalyendile pakati pa nyanja iji jili pakati pakiisu ikya Misili ni kya Isilaili. Inyanja ijo baajitigi iNyanja iNgeseefu. Fyali fiika ifikulumba. Bala kalata gwa Ukusooka 13:21-22; 14:21-29.

† **10:3 10:3** Bala kalata gwa Ukusooka 16. ‡ **10:4 10:4** Bala kalata gwa Ukusooka 17:1-7.

⁵ Looli bingi ndi abo baalinkaleesye Kyala, po leelo Kyala aabapyutile, nu kugibalanina imifimba gyabo ndungalangala.

⁶ Inongwa isi sya kukeetelamo kumyitu ukutusoka, tulingiisa kunyonywa imbiibi, bo abeene muno baanyonywelaga.

⁷ Mulingiipuutaga ku tundu utu akaja jo Kyala, bo ulu bamo pakati pamyabo baabombaga. Bo muno sisimbiigwe mwa Kalata uMwikemo ukuti, "Abandu baatugeele ukulya nu kunwa, piitaasi balinkumoga imogo sya bulogwe."§

⁸ Kangi tulingalogwaga bo ulu abangi pakati pamyabo baalogilwe, balinkugogigwa abandu 23,000 kwi isiku limo.*

⁹ Kangi tulingangelaga Kilisiti, bo ulu bamo pakati pamyabo baalingelile, balinkulumigwa ni njoka, balinkufwa.†

¹⁰ Kangi mulingiibuneesyaga bo ulu abangi pakati pamyabo baaliibuneesiisye, balinkugogigwa nu gwandumi uju aapyutaga.‡

¹¹ Po syosa isi syabaagile abeene, syasimbiigwe ukaja sya kukeetelamo, ukutusoka uswe twe baa mmasiku aga agaa kummaliikisyo.

¹² Po uju ikwibona ukuti iimile kanunu, iikeetege alingiisa kugwa!

¹³ Ingelo isi sibaagile, sili bo isi bikugeligwa abandu abangi kukuti isiku. Kyala jo gwa bwanalooli, atikubaleka ukuti mugeligwe ukukinda amaka giinu. Looli bo mukugeligwa,

§ 10:7 10:7 Bala kalata gwa Ukusooka 32:6. * 10:8 10:8 Bala kalata gwa Imbalilo 25:1-9. † 10:9 10:9 Bala kalata gwa Imbalilo 21:4-9. ‡ 10:10 10:10 Bala kalata gwa Imbalilo 16:41-49.

ikubapapo injila ijaa kusookelamo, ukuti muje na maka agaa kuumilila.

IFindu iFiikemo ifya Ntwa ni findu ifya kusoosya ku mbepo inyali

¹⁴ Po leelo bakundwe, mwepukege ukwipuuta ku tundu utu akaja jo Kyala!

¹⁵ Ngujoba bo ulo kumyinu, mwe muli na mahala, mwinogone kanunu isi ngujoba.

¹⁶ Bo tukugwa ulupi kwa Kyala ku kikombe iki tukunwela pa Findu iFiikemo, bale tutikujana bu buliilanisi na Kilisiti mwi ilopa lyake? Kangi bo tukumenya ikisyese ne kulya, bale tutikujana bu buliilanisi mu mbili gwa Kilisiti?

¹⁷ Kuli ni kisyese kimokyene itolo. Nalinga uswe tuli bingi, looli tuli mbili gumogwene, paapo tuli ne buliilanisi nkisyese iki kimokyene.

¹⁸ Namukeete inyiiho isya Banyaisilaili abaa ijolo. Aba baalyaga iikemo ili basoosiise pa kigemo, baali ne buliilanisi na Kyala. §

¹⁹ Po ngulonda ukujoba liliku? Bale, utundu utu abandu abaa kumyinu bikusoosya ku fifwani, tuli ni mbombo jojoosa? Bale, ififwani ifyo fili ne buumi?

²⁰ Himma! Isi ngujoba syo isi, ukuti iikemo ili bikusoosya abapanja, batikusookesya Kyala, looli bikusoosya ku mbepo inyali. Une ngigana umwe ukujana bu buliilanisi ni mbepo inyali.

²¹ Mukabagila ukunwa nkikombe ikya Findu iFiikemo, kangi ukunwa nkikombe ikya mbepo

§ 10:18 10:18 Bala kalata gwa Abanyaleebi 7:5-10.

inyali. Bububu mukabagila ukulya ifindu iFiikemo, po kangi ukulya ifindu ifya mbepo inyali.

²² Baati, tukulonda ukunkalasya Kyala? Bule, tuli na maka ukukinda amaka gaake?

Imbombo isya kuntuufya Kyala

²³ Bamo pakati pamyinu bikuti, "Tuli baabuke ukubomba syosa isi tukulonda," leelo une nguti, sikaja syosa isi sili ni fya kukabamo abiitiki biiniinu. Nalinga bikuti, "Tuli baabuke ukubomba syosa isi tukulonda," leelo une nguti, sikaja syosa isi sikubakasya abiitiki biiniinu.

²⁴ Kukuti mundu alingasilondaga isi sikuntuula mwene, looli asipaasyege isi sikubatuula abiinaake.

²⁵ Inyama isi bikuulisa mu sokoni, mulyege kisita kulaalusya laalusya ukuti sifumile kuugu. Inyama isyo silingabataamyaga mu ndumbula syinu,

²⁶ paapo Kalata uMwikemo ikuti, "Ifiisu fyosa pamopeene na tundu toosa utu tulimo fya Ntwa."*

²⁷ Umundu uju akaja mwitiki linga akukooliile ukulya, linga kulonda, buukaga itolo, ukalyege fyosa ifi akutendekekiisye. Ulingalaalusyaga laalusyaga ukuti fifumile kuugu. Inyama isyo silingakutaamyaga mu ndumbula jaako.

²⁸ Looli linga umundu ikukubuula ukuti, "Ifindu ifi basoosiisye ukaja ikemo ku fifwani," apo somma ukulya, ukuti umundu uju

* **10:26 10:26** Bala kalata gwa Isabuli 24:1.

akubulile alingataamigwaga, kangi ukuti indumbula jilingataamigwaga.

²⁹ Ndikuti indumbula jaako jilingataamigwaga, looli indumbula jaake umwene jilingataamigwaga.

Fiki ubulongi ubwa mu ndumbula jaa mundu ujangi, jibupinye ubwabuke bwangu?

³⁰ Linga une ngulya ifindu ifyo ngunngwila ulupi Kyala, fiki ngulongigwa kunongwa jaa findu ifi nunngwiliile ulupi Kyala?

Ukubapaasya abangi

³¹ Po kokoosa aka mukulya pamo ukunwa, pamo akangi kokoosa aka mukubomba, mubombege ukuntuufya Kyala.

³² Mulingabafulasyaga abandu mu ndumbula, baje Bajuuta, pamo balingaja Bajuuta, pamo abiiitiki biiniinu.

³³ Mujege bo une. Ngwijuula ndi syosa isi ngubomba, ukuti abandu boosa sibahobosyege. Ndikubomba bo ulo ukuti une ngabemo, looli bakabemo abandu bingi, ukuti bapokigwe.

11

¹ Mukongege akajiilo kangu, bo apa niine ngukonga akajiilo akaa Kilisiti.

Uluabaatiko ulwa kwipuuta nkipanga kya Kyala

² Ngubatuufya paapo mukungumbuka kuli syosa, nu kukola imanyisyo isi naalyambiliile nu kubamanyisya.

³ Po ngulonda musyaganie ukuti untu* gwa nnyambala jo Kilisiti, untu gwa nkiikulu jo nnyambala, nu ntu gwa Kilisiti jo Kyala.

⁴ Nkipanga kya Kyala, unnyambala gwesa uju ikwikinga kuntu bo ikwipuuta pamo bo ikukunguluka, ujo ikunsuusa Kyaliti uju jo ntu gwake.

⁵ Joope unkiikulu uju atikufwala ikitambala kuntu bo ikwipuuta pamo bo ikukunguluka, ujo ikunsuusa unnyambala, uju jo ntu gwake. Afwene na uju amwile ulupaju.

⁶ Linga unkiikulu atikufwala ikitambala kuntu, fikuti amwege inywili syake syosa. Paapo sya soni ku nkiikulu ukumwa inywili syosa, po kanunu ukufwala ikitambala kuntu.

⁷ Sitikulondigwa ku nnyambala ukufwala kokoosa kuntu, paapo umwene kifwanikisyo ikya Kyala, kang'i ali nu busisya bwa Kyala. Looli unkiikulu afwalege, paapo ali nu busisya ubwa nnyambala.

⁸ Namanga Kyala akaalimpelile unnyambala jula Atamu ukufuma ku nkasi Efwa, looli aalimpelile unkiikulu jula ukufuma ku nnyambala.

⁹ Kang'i Kyala akaalimpelile unnyambala jula Atamu kunongwa jaa nkasi, looli aalimpelile unkiikulu jula Efwa kunongwa jaa nnyambala.

¹⁰ Kunongwa jaa isyo syosa, na kunongwa jaa bandami, abakiikulu bikulondigwa ukunangisya ukuti bulipo ubulagili pamwanya pamyabo.

* **11:3 11:3** Untu Kokuti Umundu umwene bulagili pamo Umundu uju bo bwandilo.

11 Looli nkyeni mu Ntwa, unkiikulu ikansubila unnyambala, joope unnyambala ikansubila unkiikulu,

12 namanga unkiikulu ugwa kwanda aapeli-igwe ukufuma ku nnyambala, luluulo joope unnyambala ikupaapigwa na nkiikulu. Looli syosa sikufuma kwa Kyala.

13 Po namutumule jujumwe. Bule, kanunu unkiikulu ukwipuuta kisita kufwala ikitambala kuntu?

14 Bule, syope ni nyiiho isya bandu sitikunangisya ukuti, linga unnyambala ali ni nywili indali, sya soni kumyake?

15 Na kuti unkiikulu linga ali ni nywili indali,[†] bule, sitikutwala ubusisya kumyake? Sili bo ulu paapo apeeliigwe inywili indali ukuba bo ulwa kitambala ikyo kwikinga kuntu.

16 Looli linga umundu ikukaanika inongwa isya kwikinga kuntu, uswe ni fipanga ifya Kyala tukaja na lwiho ulangi.

Akajjilo akabiibi ku Findu iFiikemo

17 Po ndi nasyo isingi isya kubalagila. Ndi isi ndikubatuufya, namanga ingomaano syinu, sitikutwala ifya kukabamo.

18 Akaa kwanda, mbiliike ukuti bo mubungeene nkipanga kya Kyala, mukutapukana. Isi mbiliike, simo ngusiitika.

19 Bule, mukwinogona ukuti mpaka mutapukane? Bule, mukulonda bamanyigwe aba bikwibona ukuti babagiisye nkyeni mwa Kyala?

[†] 11:15 11:15 Inywili indali Akabalilo ako lwali lwiho ulwa bakiikulu ukukasya fiijo inywili ukuba ndali.

²⁰ Keeta, bo mubungeene, ifi mukulya fikaja Findu iFiikemo fya Ntwa Jesu,

²¹ namanga bamo mmyinu bikulya mbimbibi ifindu fyabo, kisita kulya na biinaabo. Ilyo likubapela bamo ukuya ni njala, bamo bikugaala.

²² Isi sya soni! Bule, mukaja ni nyumba isi mubagiile ukuliilamo nu kunwa? Fiki mukukifujula ikipanga kya Kyala, nu kubakosya isoni aba bakaja nafyo nafimo? Bule, mbabwile siliku? Mbatuufye? Himma! Ku nongwa isi ndikubatuufya.

IFindu iFiikemo bo muno sikulondeligwa ukulya

(Matai 26:26-29; Maalika 14:22-25; Luka 22:14-20)

²³ Imanyisyo isi naalyambiliile ku Ntwa syo isi naabamanyisye umwe. Naababwilele ukuti, pakilo kila iki baalinndiiliile uNtwa Jesu, alinkwega ikisyesye,

²⁴ alinkugwa ulupi kwa Kyala, alinkukimenya, alinkuti, “Ugu go mbili gwangu, ugu guningiigwe kunongwa jinu. Mubombege bo ulu ukungumbuka une.”

²⁵ Kangi bo baliile ifindu, Jesu alinkwega ikikombe ikya finga,‡ alinkuti, “Ikikombe iki ikya finga lo lwitikano ulupya mwi ilopa lyangu.§ Bwila bo mukunwa, mubombege ukungumbuka une.”

‡ 11:25 11:25 *Ifinga* Bala ku Isyakulingaania. § 11:25 11:25 *Ulwitikano ulupya mwi ilopa lyangu* Bala iisya *Ulwitikano* ku Isyakulingaania.

²⁶ Po bo mukulya ikisyesye ikyo, nu kunwa ikikombe ikyo, mukufumusya ukufwa kwa Ntwa mpaka akabalilo aka aikwisa.

²⁷ Umundu gwesa uju ikulya ikisyesye ikya Ntwa nu kunwa ifinga ijo kisita lwimiko, ikutula inongwa, namanga agwileemwe umbili ni ilopa lya Ntwa.

²⁸ Po leelo umundu iijeeneesyeye taasi juu, po alyege ikisyesye ikyo nu kunwa ifinga ijo,

²⁹ namanga umundu linga ikulya ikisyesye nu kunwa ifinga kisita kumanya ukuti mbili gwa Ntwa,* ujo ikwibiika mbulongi bwa Kyala.

³⁰ Fyobeene balipo bingi pakati pamyinu aba boonywa na babine, kangi bamo bafwile.

³¹ Linga twijeeneesiisye juuswe taasi, bo tukaali ukulya, ngali tutikulongigwa.

³² Looli linga tukulongigwa nu Ntwa, apo tukumanyisigwa ukuti tulingiisa kulongigwa, bo ula bikulongigwa aband u aba bakammanya Kyala.

³³ Po leelo baamyitu ndwitiko, bo mubungeene pakulya, muguulilanege.

³⁴ Linga umundu ali ni njala, alyege kukaaja kaake, ukuti ukubungaana kwinu kulingabapelelaga ukulongigwa. Kangi bo ngwisa, angusitendekesya kanunu isi sisyele.

12

Ifikungilwa ifya Mbepo Mwikemo

* **11:29 11:29** Umbili gwa Ntwa Kokuti Umbililanis u bwa bandu abaa nkipanga kya Kyala.

1 Po baamyitu ndwitiko, ngiigana ukuti mulingasyagania isya fikungilwa ifya Mbepo Mwikemo.

2 Mumeenye ukuti bo muli bapanja, mwasy-obigwaga nu kulongosigwa kukwipuuta ku fifwani ifi fitikujoba.

3 Po leelo nikubabwala nikuti, umundu uju ikulongosigwa na Mbepo gwa Kyala, akabagila ukujoba ukuti, "Jesu agunigwe." Kangi umundu uju atikulongosigwa na Mbepo Mwikemo, akabagila ukujoba ukuti, "Jesu jo Ntwa."

4 Ifikungilwa ifya luko nu luko, looli fikufuma kwa Mbepo jumojwene.

5 Ububombeli ku Ntwa bwa luko nu luko, looli uNtwa uju ikubombeligwa ali jumojwene.

6 Imbombo sya luko nu luko, looli Kyala ali jumojwene, uju ikutupela uswe twesa, ukubomba imbombo isyo syosa.

7 Kukuti mundu apeeliigwe ukunangisya pabwelu imbombo isya Mbepo Mwikemo, ukuti abandu boosa bakabege.

8 Umundu jumo apeeliigwe na Mbepo amasyu agaa mahala, ujungi apeeliigwe amasyu agaa bumanyi na Mbepo jujujjo.

9 Mbepo jujujjo jumojwene, ikumpela jumo ukujja nu lwitiko, ujungi ikumpela ukujja ni fikungilwa ifya kubumbulasya ababine,

10 ujungi ukubomba ifiika, ujungi ubukunguluka, ujungi ukusimanya imbepo inyali na Mbepo gwa Kyala, ujungi ukujoba injobelo imbya, ujungi ukusisanusya injobelo isyo.

11 Imbombo syosa isi ikubomba Mbepo jujūjo, kangi ikumpapo kukuti munda bo muno iiganiile Mbepo.

Umbili guli nu tumbakaasya twingi

12 Bo muno gujiiliile umbili gwa munda, mo muno gujiiliile umbili gwa Kilisiti.* Umbili kanda kamokeene, looli guli nu tumbakaasya utwingi. Na paapo twingi, twa mbili gumogwene.

13 Uwe twesa, tije Bajuuta pamo aba bakaja Bajuuta, tije batamwa pamo tije baabuke, twalyosiigwe na Mbepo jumojwene, ukuti tije mbili gumogwene. Kangi twapeeliigwe Mbepo jumojwene, Mbepo gwa Kyala.

14 Umbili gutikuya kambakaasya kamokeene, looli tumbakaasya twingi.

15 Linga ikilundi kyatigi, “Paapo une ngaja kiboko, po ngaja gwa mbili,” bale, ikilundi iki ngali kitikuya kya mbili?

16 Linga imbulukutu joope jaatigi, “Paapo une ngaja kisige, po ngaja gwa mbili,” bale, imbulukutu iji ngali jitikuya jaa mbili?

17 Linga umbili goosa gwali kisige, ukupilika ngali kuli buleebule? Pamo linga umbili goosa gwali mbulukutu, ukunuusya ngali kuli buleebule?

18 Looli Kyala akabaatiike kukuti kambakaasya akaa mbili bo muno iiganiile umwene.

19 Linga umbili gwali na kambakaasya kamo-keene itolo, bale, ngali mbili nki?

* **12:12 12:12** Umbili gwa Kilisiti Kokuti Abandu boosa baa Kyala pamo ikipanga kya Kyala.

20 Po utumbakaasya twingi, leelo umbili guli gumogwene.

21 Ikisige kikabagila ukukibuula ikiboko ukuti, “Ugwe ukaja nu butuuli nabumo kumyangu.” Goope untu gukabagila ukagabuula amalundi ukuti, “Umwe mukaja nu butuuli nabumo kumyangu.”

22 Looli utumbakaasya utwa mu mbili utu tukuboneka ukaja toonywa, to utu tuli ni mbombo fiijo.

23 Kangi utumbakaasya utu tukuboneka ukaja twa kukosya isoni, to utu tukutwimika fiijo. Toope utumbakaasya utu tutikulondigwa ukuboneka pabwelu, uto to utu tukutufisa fiijo.

24 Kangi utumbakaasya utu tukuboneka ukaja tununu, tutikutufisa bo utungi. Looli Kyala agubaatiike kanunu umbili, utumbakaasya utu tutikwimikigwa, umwene ikutwimika fiijo,

25 ukuti kulingajapo ukutapukana mu mbili, looli utumbakaasya toosa tutaulanega.

26 Akambakaasya kamo linga kafuleele, toosa tukufulala pamopeene nako. Kangi linga akambakaasya kamo kikwimikigwa, toosa tukaja nu lusekelo pamopeene nako.

27 Bo muli na nuumwe, muli mbili gwa Kilisiti. Kukuti mundu kambakaasya mu mbili ugo.

28 Po nkipanga kya Kyala, ababiikile ukaja baa kwanda abatamigwa, abaa bubili abakunguluka, abaa butatu abamanyisi. Po alinkubabiika abapela fiika, abaa fikungilwa ifya kubumbulasya ababine, abaa fikungilwa ifya butuuli ku bangi, ifya bulongosi, ni fya kujobela mu njobelo imbya.

29 Bule, abandu boosa batumigwa? Bule, abandu boosa bakunguluka? Bule, abandu boosa bamanyisi? Bule, abandu boosa bikupela ifika?

30 Bule, abandu boosa bali ni fikungilwa ifya kubumbulunya ababine? Bule, abandu boosa bikujobela mu njobelo imbya? Bule, kangi abandu boosa bapeeliigwe ukusanusya injobelo?

31 Po mwijwalege ukukaba ifikungilwa ifikulumba.

Une ngubanangisya injila inunu fiijo, ukukinda injila isingi syosa.

13

Ulugano

1 Poope nalinga ngujoba injobelo syosa,
isya bandu ni sya bandumi,

looli linga ngaja nu lugano,
ngali ndi bo ikyela itolo, iki kikulila,
nu njwego ugwa ibangala.

2 Kangi nalinga ndi ni kikungilwa ikya
bukunguluka,

nu kusimanya syosa isya mbutiitu, na ma-
hala goosa,

nalinga ndi nu lwitiko ulunywamu
ulwa kusaamisya ifyamba,

looli linga ngaja nu lugano,
bo ndi gwa itolo.

3 Kangi nalinga ngusoosya ikyuma kyangu kyosa,
ukubapapo abalondo,

nalinga ngwisoosya umbili gwangu,

ukuti gupye mmooto,*
linga ngaja nu lugano,
ndikukabamo nafimo.

⁴ Ulugano lukupela ukuumiilila,
ukuja bape, ukusita kuja na kabini,
ukusita kwituufya, ukusita kwijumbika.

⁵ Ulugano lutikupela ukubiilaamwa abangi,
lutikupela ukwinogona syene isyitu,
lutikupela ukukalala mbibimbibi,
nu kukumbuka imbiibi isya bandu.

⁶ Ulugano lukupela ukusita kusekelela ububiibi,
looli ukusekelela isya bwanalooli.

⁷ Ulugano lukupela ukuumiilila syosa,
ukuja nu lwitiko akabalilo koosa,
ukuja nu lusubilo akabalilo koosa,
nu kwijwula ndi syosa.

⁸ Ulugano lutikumalikamo siku.
Looli ubukunguluka bukulika,
ukujoba injobelo kukumalika,
ubumanyi bukukinda.

⁹ Namanga tasyageenie mbunandi,
kangi tukukunguluka mbunandi.

¹⁰ Looli bo kwisile ukusita kwagilwa,
isi syagiilwe sikwisa kumalika.

¹¹ Bo ndi nkeke naajobaga isya bukeke, ama-
hala gaali gaa bukeke, niinogonaga ulwa bukeke.
Looli paapo ndi nkusi, isya mbukeke nsilekile.

* **13:3 13:3** *Ukuti gupye mmooto* Mwa baakalata bamo abaa ijolo basimbile *Ukuti niituufye.*

12 Namanga akabalilo aka tukufwana tukukeetela nkikeetelo ndufunienie, looli akabalilo aka kikwisa tukwisa kufibona na maaso muno fijiiliile. Akabalilo aka tasyageenie mbunandi. Looli akabalilo aka kikwisa, tukwisa kusyagania loosa, bo muno Kyala atumanyiile uswe.

13 Po fitatu ifi aafitikumalika siku, ulwitiko, ulusubilo nu lugano. Looli ndi ifyo, ulugano lo lukulumba.

14

Ifikungilwa ifikulumba nkipanga kya Kyala

1 Mwijuulege ukaja nu lugano pakati pamyinu, kangi mwijuulege ukafilonda ifikungilwa ifya Mbepo Mwikemo, fiijo ikikungilwa ikya bukunguluka.

2 Umundu uju ikujoba injobelo imbya, atikujoba na bandu, looli ikujoba na Kyala. Isi ikujoba akajapo uju ikusyagania. Umwene ikujoba isya mbutiitu, ku maka agaa Mbepo gwa Kyala.

3 Looli uju ikujoba isya bukunguluka, ikujoba isya kubajenga abiitiki ndwitiko, isya kubakasya nu kubasubisya.

4 Uju ikujoba injobelo imbya, ikwikasya juju, looli uju ikukunguluka ikukikasya ndwitiko ikipanga kya Kyala.

5 Une niiganile umwe mwesa mujobege injobelo imbya, looli fiijo niiganile mukungulukege. Namanga ikikungilwa ikya bukunguluka kikulumba ukukinda ikya kujoba injobelo imbya, kisita kusanusya. Kanunu

asanusye ukuti akikasye ikipanga kya Kyala ndwitiko.

Ukukijenga ikipanga kya Kyala

⁶ Baamyitu ndwitiko, bule, linga niisile kumyinu nu kujoba injobelo imbya, mukukabamo ifiki? Mutukabamo nafimo. Looli linga ngubalingaania isi Kyala aasetuliile, pamo linga ngujoba isya bumanyi, pamo ngukunguluka, pamo linga ngumanyisya, apo mukukabamo.

⁷ Bo sili na ku tundu utusita buumi, ifi fikulila bo fikukubigwa, gaje malonge, fiye fisango. Linga fikulila kisita lubaatiko, umundu abagiile ukumanya buleebule ukuti lwimbo nki?

⁸ Kangi linga ingangabwite jikulila iisya ili litikumanyigwa na bandu, jo jwani uja abagiile ukwitendekesya ku bwite?

⁹ Bo sili kumyinu. Linga mukujoba isi sitikumanyigwa, jo jwani abagiile ukusyagania isi mukujoba? Isi mukujoba sikukula nu mbelo!

¹⁰ Pakiisu silipo injobelo nyingi, looli jikajako najimo iji jikaja ni mbombo.

¹¹ Po linga ngajimanya injobelo iji ikujoba ujungi, ikuja ngati nheesya kumyangu, kangi nguja ngati nheesya kumyake.

¹² Sili bo ulo kumyinu. Mwiganile fiijo ukuja ni fikungilwa ifya Mbepo Mwikemo, po mwijuelege fiijo ukukaba ifikungilwa ifi fikukijenga ikipanga kya Kyala.

Ukunsuuma Kyala ku ndumbula na mahala

13 Kanongwa ijo umundu uju ikujoba injobelo imbya, ansume Kyala ukuti antuule ukusanusya.

14 Namanga linga ngwipuuta mu njobelo imbya, indumbula jangu jo iyi jikwipuuta, looli amahala gangu gatikukaba nafimo.

15 Po ngulondigwa ukubomba ifiki? Ngwipuutaga mu njobelo imbya mwa Mbepo Mwikemo, kangi ngwipuutaga na ku mahala gangu. Ngwimbaga mu njobelo imbya mwa Mbepo Mwikemo, kangi ngwimbaga na ku mahala gangu.

16 Linga kuntuufya Kyala mu njobelo imbya, umundu ujungi uju akaja ni kikungilwa ikya kusimanya injobelo imbya, ikujobaga buleebule ukuti, "Ameni," ku masyu aga akagaagania?

17 Kумыako kuntuufya Kyala nalooli, looli abangi bala sitikubakasya ndwitiko.

18 Ngugwa ulupi kwa Kyala paapo ngujoba mu njobelo imbya ukubakinda umwe mwesa.

19 Looli nkipanga kya Kyala niiganile fiijo ukujoba amasyu mahaano aga abandu babagiile ukusyagania, ukuti mbamanyisye abangi. Ilyo lyo inunu ukukinda ukujoba amasyu 10,000 mu njobelo imbya.

Ikimanyilo ku biitiki na kuli aba bakaja biitiki

20 Baamyitu ndwitiko, mulingiinogonaga bo ulwa bakeke. Ku mbiibi mujege bo ulwa bakeke muno bajiiliile, looli mwinogonege bo ulwa bandu abakusi.

21 Mwa Kalata uMwikemo sisimbiigwe ukuti, "Nalooli ku njila ijaa baheesya abaa mbutali,

aba bikujoba injobelo iheesya,
ngwisa kujoba na bandu aba,
poope batikwisa kumbilikisya,”*
ikujoba uNtwa Kyala.

²² Po ukujoba injobelo imbya, kimanyilo kuli aba bakaja biitiki, komma ku biitiki. Looli ikikungilwa ikya bukunguluka kimanyilo ku biitiki, kikaja kya aba bakaja biitiki.

²³ Mu ngomaano syinu isya nkipanga kya Kyala, linga umwe mwesa mwandile ukujoba mu njobelo imbya, po bikwingila abaheesya pamo aba bakaja biitiki, bule, batikutigi muli ni mbepo?

²⁴ Looli linga mwesa mukukunguluka, po ikwisa umundu unheesya pamo uju akaja mwitiki, ikwimanya ukuti ntulanongwa, ikulongigwa na syosa isi ikupilika.

²⁵ Isi sili mu ndumbula jaake sikuja pabwelu, po ikufugama nu kuntuufya Kyala, ikujoba ikuti, “Nalooli Kyala ali pamopeene na nuumwe!”

Umbaatiko ulwa kwipuuta abiitiki

²⁶ Po baamyitu ndwitiko, tujobe ifiki? Bo mubungeene pakwipuuta, jumo ali nu lwimbo, ujungi ali ni manyisyo, jumo ikujoba isi Kyala ansetuliile, ujungi ikujoba mu njobelo imbya, jumo ikusanusya injobelo. Isi syosa sibombigwege ku nyango ijaa kukikasya ikipanga kya Kyala.

²⁷ Linga balipo aba bikujoba mu njobelo imbya, bajobege babili pamo batatu,

* 14:21 14:21 Bala kalata gwa Jeosaja 28:11-12.

balingakindaga apo, bajobege ku njila jaa kuguulilana, kangĩ ajengepo ugwa kusanusya.

²⁸ Linga akajapo ugwa kusanusya, po ujũ ikujoba injobelo imbya aleke ukujoba nkipanga kya Kyala, looli ajobege mu ndumbula mwene, na kwa Kyala kwene.

²⁹ Boope aba bikukunguluka, bakungulukege babili pamo batatũ, abangi basipimege isi bikusijoba.

³⁰ Linga jũmo ndi aba bikupilikisya, limmwisiile iisya ilya busetuli, ugwa kwanda amyeke.

³¹ Kukuti mundũ ujũ ali nũ bukunguluka, ajege na kabalilo akaa kujoba, apo abandũ boosa bikumanyisigwa nũ kukasigwa.

³² Ujũ ikukunguluka ikwijiisya ku bakunguluka abangi.

³³ Namanga Kyala akaja jo Kyala ugwa ndapukano, looli jo Kyala ugwa lutengaano.

Sili bo ulũ, abiitiki bo babungeene mfipanga fya Kyala,

³⁴ abakiikulu balingajobaga, paapo bakiitikisigwa ukujoba. Looli biijiisyege, bo muno ikujobela Kalata gwa Ndagilo.

³⁵ Linga bikulonda ukusimanya inongwa simo, babalaalusyege abalume baabo kukaaja, paapo sya soni unkiikulu ukujoba pabwelu nkipanga kya Kyala.†

† 14:35 14:35 Abakiikulu abo baalondaga ukupelelesya inongwa isya balume baabo pabwelu nkipanga kya Kyala. Nalinga Pauli ikuti hapime isi sikujobigwa nkipanga kya Kyala (nkanandi akaa 29), leelo isi silingatwalaga indapukano mu nyiiputo.

³⁶ Bule, iisya lya Kyala lyalyandiile kumyinu? Bule, iisya lya Kyala lyafikile kumyinu kwene?

³⁷ Linga umundu ikwibona ukuti ali ni kikungilwa ikya bukunguluka, pamo ikikungilwa ikingi ikya Mbepo Mwikemo, asyaganiege ukuti isi ngubasimbila, lalagilo ulwa kufuma ku Ntwa Jesu.

³⁸ Uju ikusiilaamwa isi, joope mummwilaamwege.

³⁹ Po leelo baamyitu, mwijualege ukulonda ikikungilwa ikya bukunguluka, kangi mulingabasigilaga abandu ukujoba injobelo imbya.

⁴⁰ Looli syosa isi sibombigwege kanunu, kangi ku lubaatiko.

15

Ukusiya kwa Kilisiti

¹ Po baamyitu ndwitiko, ngulonda ukubakumbusya iNdumi iNunu iji naalumbiliile kumyinu, nuumwe mwajambiliile. Ijo jo iji jibapelile ukwima ndwitiko ula muli nalo.

² Nalooli ukwendela mu Ndumi iNunu iji naa-balumbiliile, mukupokigwa, linga mukajikola kanunu. Looli linga mukajikola, ulwitiko lwinu bo lwa itolo.

³ Une naabamanyiisye imanyisyo ingulumba isi naalyambiliile isya kuti, Kilisiti aafwile ukuti abusoosyepo ubutulanongwa bwitu, bo muno sisimbiigwe mwa Kalata uMwikemo.*

* 15:3 15:3 Bala kalata gwa Jeesa 53:5-12.

4 Nu kuti aasyiliigwe, iisiku lya butatu aasyukile, bo muno sisimbiigwe mwa Kalata uMwikemo.†

5 Nu kuti aalinsetukiile Peeteli, po alinkubasetukila abatumigwa baake kalongo na babili.

6 Piitaasi alinkubasetukila abiitiki imia ihaano aba baali pamopeene. Bingi ndi abo na ulu bakaali buumi, bamo bafwile.

7 Po alinkunsetukila Jaakobo, kangi alinkubasetukila abatumigwa boosa.

8 Po kummaliikisyo alinkuusetukila une, ne ndi bo ulwa mwana uju apaapiigwe pakabalilo aka kakaja kookaako.

9 Une ndi gwa paasi mbatumigwa, ngabagisya nu kujobigwa ukuja ntumigwa, paapo kubwandilo naakifwimaga ikipanga kya Kyala.

10 Looli iliipyana lya Kyala lyo ili limbelile une ukuja ntumigwa. Kangi iipyana lyake kumyangu likaali lya itolo, namanga mbombile imbombo ukubakinda abatumigwa abangi boosa. Ngabomba isyo ku maka gangu, looli kwi ipyana lyake ili lili pamopeene na niine.

11 Po leelo linga jo une ne naabalumbiliile, pamo abatumigwa abangi bala, tukulumbilila iNdumi iNunu jilajila, kangi jo iji mujiitiike.

Ukusyusigwa abandũ

12 Po uswe tukulumbilila ukuti Kilisiti aasyukile ukufuma mbafwe. Sili buleebule bamo pakati pamyinu bikuti kukajako ukusyuka abafwe?

† 15:4 15:4 Bala kalata gwa Isabuli 16:8-10.

¹³ Linga kukaaliko ukusyuka abafwe, po Kilisiti joope akaasyukile.

¹⁴ Kangi linga Kilisiti akaasyukile, po ukulumbilila kwitu ngali kwa itolo, na lwitiko lwinu ngali lwa itolo.

¹⁵ Ukongelapo pali isyo, uswe ngali tukuboneka ukuja bakeeti baa butungulu baa isi abombile Kyala, namanga tukusisimikisya ukuti Kyala aalinsyusiisye Kilisiti mbafwe. Linga ukusyuka kwa bafwe kukajako, po Kilisiti akaasyukile.

¹⁶ Linga abafwe batikusyusigwa, po joope Kilisiti akaasyukile.

¹⁷ Linga Kilisiti akaasyukile, po mukakabamo nafimo ukummwitika Kilisiti, looli bo mukaali musyele mbatulanongwa bwinu.

¹⁸ Na aba bafwile bo bammwitiike Kilisiti, basobile loosa.

¹⁹ Linga ulusubilo lwitu kwa Kilisiti lukumalikila pakabalilo akaa kufwa, apo ngali tuli bandu baa kupeleligwa ikisa ukukinda abandu boosa.

Kilisiti aasyukile, ikwisa kulongosya kumwanya

²⁰ Looli ubwanalooli bo ubu, Kilisiti aasyukile ukufuma mbafwe, jo gwa kwanda ukusyuka, ukuti aba bafwile boope bikwisa kusyuka.

²¹ Bo ulu ubufwe bwaliisile ku njila jaa mundu jumo, bububu koope ukusyuka mbafwe kwaliisile ku njila jaa mundu ujungi.

22 Linga abandũ boosa bikufwa paapo baa ndujungu lwa Atamu, bubũbo abandũ boosa bikwisa kusyuka kunongwa jaa Kilisiti.

23 Po kukuti mundũ ikwisa kusyusigwa pakabalilo aka aakabiikile Kyala. Kilisiti jo ujũ aatalile ukusyuka, piitaasi bikwisa kusyusigwa abandũ baake, bo ikwisa.

24 Apo po gukwisa ummaliikisyo ugwa fyosa, po Kilisiti ikwisa kumpa Taata Kyala ubutwa bwake, bo Kilisiti apyutile ubulagili boosa nu bukũmba boosa na maka goosa.

25 Fikuti Kilisiti ajege Ndagili gwa pakiisu, mpaka Kyala abatole nu kubabiika abalũgu baake paasi, pa malũdi gaake.‡

26 Undũgu ugwa kummaliikisyo ukupyutigwa, jo bũfwe.

27 Namanga Kalata uMwikemo ikuti, “Atubiikile utundũ toosa paasi pa malũdi gaake.”§ Kalata uMwikemo apa ikuti, “Utundũ toosa,” kukaja kokuti joope Kyala aikujamo ntundũ uto, paapo umwene jo ujũ abiikile toosa uto mbulagili ubwa Kilisiti.

28 Po utundũ toosa bo tubiikiigwe mbulagili ubwa Mwanaake,* po joope uMwana ikwisa kwibiika mbulagili ubwa Gwise, ujũ abiikile utundũ toosa mbulagili ubwa Mwanaake, ukuti Kyala ajege Ndagili gwa fyosa.

Linga kukajako ukusyuka, ubũmi bwitu bukaja na mbombo najimo

‡ 15:25 15:25 Bala kalata gwa Isabũli 110:1. § 15:27 15:27 Bala kalata gwa Isabũli 8:6. * 15:28 15:28 uMwanaake Bala iisyũ uMwana gwa Kyala ku isyakulingaania.

29 Po aba bikoosigwa kunongwa jaa bandu aba bafwile bikusubila ifiki? Linga abafwe batikusyuka siku, fiki abandu abo bikoosigwa kunongwa jaa bafwe?

30 Fiki na nuuswe tukwibiika mbutolwe kukuti isiku?

31 Kukuti isiku une ndi mbutolwe ubwa kugogigwa. Baamyitu ndwitiko, uko ko kwituu-fya kwangu kunongwa jinu, uku ndi nako mwa Kilisiti Jesu uNtwa gwitwa.

32 Linga kukajako ukusyuka, naakabilemo ifiki ukulwa na bala abaa ku Efesi, aba bali bo ulwa finyamaana ifikali? Linga kukajako ukusyuka, po,

“Tulyege, tunwege,
kilaabo tukufwa.”†

33 Mulingiisyobaga! “Abamanyaani ababiibi, bikoonaaga akajijilo akanunu.”

34 Mujege na mahala, mwinogonege kanunu! Muleke ukutula inongwa! Bamo pakati pamyinu bakammanya Kyala. Ngajoba isyo ukuti sibakole isoni.

Muno aagukujila umbili iisiku ilya kususigwa

35 Po umundu abagiile ukulaalusya ukuti, “Abafwe bikwisa kususigwa buleebule? Bikwisa kuja ni mibili igi gili buleebule?”

36 Isyo nyiinogono isya nkonyofu! Keeta, linga ubyele imbeju, jikabagila ukumela kisita kufwa.

37 Iji kubyala mbeju itolo, jije jaa nganu pamo uluko ulungi, utikubyalala ifi fimelile.

† 15:32 15:32 Bala kalata gwa Jeosaja 22:13.

38 Looli Kyala ikujipapo imbeju ijo umbili ugungi, ugu aguganile umwene. Kukati mbeju ikujipa umbili gwake.

39 Ifipeligwa fyosa fili ni mibili, leelo imibili igyo gikafwana. Imibili igya bandu gili lwake, igya finyamaana gili lwake, injuni gili lwake, ni iswi gili lwake.

40 Kangi gilipo imibili gya tundu utwa kumwanya, ni mibili gya tundu twa nkiisu. Ubununu ubwa mibili gya tundu utwa kumwanya buli lwake, na bununu ubwa mibili gya tundu twa nkiisu buli lwake.

41 Ubununu ubwa isaba buli lwake, ubununu ubwa mwesi na bwa ndondwa buli lwake. Syope indondwa silegeene ubununu.

42 Mo muno aasikujila bo abafwe bikusyuka. Gukusyiligwa umbili ugu gukubola bo ulwa kubyala imbeju, po gukusyusigwa umbili ugu gukujako bwila na bwila.

43 Umbili bo gukusyiligwa gukaja na busisya, looli bo gukusyusigwa gukaja na busisya. Bo gukusyiligwa gukaja na boonywa, looli bo gukusyusigwa gukaja na maka.

44 Imibili igi tuli nacyo bo tukaali ukufwa, mibili gya pakiisu, looli imibili gyitu bo gikusyusigwa, gikwisa kuja mibili imipya igi gikupeligwa na Mbepo Mwikemo. Paapo gilipo imibili igya pakiisu, kangi gilipo imibili imipya, igi Mbepo Mwikemo ikugipela.

45 Mwa Kalata uMwikemo sisimbiigwe ukuti, "Umundu ugwa kwanda Atamu, aapeliigwe,

alinkuja mundu umuami.”‡ Looli Atamu ugwa bumaliikisyo uju jo Kilisiti, jo Mbepo uju ikubapa aband u mibili imipya igya bwila na bwila.

⁴⁶ Imibili igi gikwisa kupeligwa na Mbepo Mwikemo, gikaja bo ulwa mibili igya kwanda. Looli gyal mibili igya pakiisu igi gyatalilepo kuli gila igya Mbepo.

⁴⁷ Umundu ugwa kwanda jula Atamu aafumile pakiisu, aapeliigwe ukufuma mu mfu. Atamu ugwa bubili ali nu mbili ugwa kumwanya.

⁴⁸ Muno ajiliile umundu ugwa mu mfu, mo muno bajiliile aband abaa pakiisu apa. Muno ajiliile uju ali nu mbili ugwa kumwanya, mo muno bikwisa kujilaga aband aba bali ni mibili igya kumwanya.

⁴⁹ Bo muno tufwaniile na uju aapeliigwe mu mfu,§ tukwisa kufwana na uju ali nu mbili ugwa kumwanya.

Ubwufwe bukwisa kutoligwa nu kupyutigwa

⁵⁰ Po baamyitu ndwitiko, isi ngujoba syo isi, imibili gyitu igya pakiisu gikabagila ukwingila mBunyafyale bwa Kyala. Aka kikubola kakabagila ukwisa kuja kandu aka katikubola.

⁵¹ Namupilikisye, nikubabuula isi sifisiigwe. Uswa tutikwisa kufwa twesa, looli twesa tukwisa kwanduligwa.

⁵² Ingangabwite ijaa kumaliikisyo bo jikulila, tukwisa kwanduligwa akabalilo kamokeene, bo ulwa mundu uju ikupiinia. Bo sijiliile, abafwe bikwisa kusyusigwa nu

‡ 15:45 15:45 Bala kalata gwa Ubwandilo 2:7. § 15:49 15:49 Bala kalata gwa Ubwandilo 1:26.

kupeeligwa imibili igi gitikubola siku. Uwe twesa tukwisa kwanduligwa,

⁵³ paapo ifi fikubola mpaka fyanduligwe ukujja fisita kubola. Ifi fikufwa mpaka fyanduligwe ukujja fisita kufwa.

⁵⁴ Akabalilo ako, aka fyosa ifi fikubola fikwisa kwanduligwa ukujja fisita kubola, na fyosa ifi fikufwa fikwisa kwanduligwa ukujja fisita kufwa, po apo sikwisa kuboneka isi sisimbiigwe mwa Kalata uMwikemo ukuti,

“Kyala abutolile ubufwe, butoliigwe loosa!”*

⁵⁵ “Ugwe bufwe, ubutoli bwako buli kuugu?

Kali kuugu akasuufi kaako, akaa kutwala ukubaba?”†

⁵⁶ Akasuufi akaa bufwe bo butulanongwa, ubutulanongwa bukukaba amaka gaake ukufuma ku ndagilo.

⁵⁷ Looli tuntuufyege fijo Kyala, uja ikutupapo ubutoli ku butulanongwa, na ku bufwe, ku njila jaa Ntwa gwitu Jesu Kilisiti.

⁵⁸ Po leelo, baamyitu bakundwe, mukakege, mulingasukaanikaga ndwitiko. Amasiku goosa mukindililege ukubomba imbombo jaa Ntwa Jesu, paapo mumeenye ukuti imbombo iji mukubomba ku Ntwa Jesu, jikaja jaa itolo.

16

Ifya kusangula ukubatumula abiitiki

* **15:54 15:54** Bala kalata gwa Jeesa 25:8. † **15:55 15:55** Bala kalata gwa Osija 13:14.

¹ Po isya kusangula ifya kubatwula abiitiki, mubombege bo muno naabalingeenie abaa nkipanga kya Kyala ikya mu Galatiya.

² Pi isiku ilya pa ndungu,* kukuti mundu ajabege utundu nu kubika ukukongana na muno Kyala ansajiile, ukuti bo ngwisa kumyinu naagege mubungeenie.

³ Bo niisile, ngwisa kubatuma na kalata abandw aba aamukubasala, ukuti batwale ifi musangwile ku Jelusalemu.

⁴ Linga sikulondigwa ukubwuka niine kula, apo po ngwisa kubwuka pamopeenene na bandw abo.

Umbaatiko ulwa Pauli ukubwuka ku Kolinti

⁵ Bo mfumile nkiisu kya Maketonija, po ngwisa kumyinu ku Kolinti, paapo ngulonda taasi ukwendela ku Maketonija.

⁶ Po bo niisile kumyinu, ngwinogona ukwisa kutwugala na nuumwe, pamo akabalilo koosa akaa mapepo, ukuti mundwale ukubwuka koosa kuno angubwukaga.

⁷ Ngiigana ukwisa kutwugala kukabalilo akapimba bo ulwa mwenda njila. Linga uNtwa iitiike, ngusubila ukutwugala kumyinu kukabalilo akatalipo.

⁸ Ngusyala mu Efesi, mpaka pa kyaka kya Pentekositi.†

⁹ Namanga Kyala ambeelee akabalilo akanunu akaa kubomba imbombo inywamu nkaaja aka, looli balipo abandw bingi aba bikusigila.

* **16:2 16:2 Isiku ilya pa ndungu** Bala ku Isyakulingaania.

† **16:8 16:8** Bala kalata gwa imbombo sya Batumigwa 19:8-10.

10 Timoti linga ikwisa kumyinu,‡ mummwambilile na kunswila, ukuti atugale na nuumwe kanunu kisita kutiila, namanga joope ikubomba imbombo ijaa Ntwa bo une.

11 Po umundu gwesa alingammwilaamwaga. Looli muntuulege asookeke uko na lutengaano, ukuti iise kumyangu, paapo une ngunguulila pamopeene na biitiki biiniitu.

12 Po isya gwamyitu ndwitiko Apolo, numpyeliisye ukuti iise kumyinu pamopeene na biitiki abangi. Looli umwene akiigana ukwisa ula, looli ikwisa linga akaagile akabalilo.

Amasyu agaa kumaliikisya ni sya kubalagila

13 Mujege maaso, mwimege kanunu ndwitiko, kangi mujege bakifu, mwikasyege.

14 Mubombege syosa ndugano.

15 Mumeenye ukuti Sitefana§ pamopeene na bandu abaa nnyumba jaake, bo aba baali baa kwanda ukummwitika Jesu Kilisiti nkiisu ikya mu Akaja, boope baaliiningile fiijo ukubatuula abiitiki! Baamyitu ngubapyelesya,

16 na nuumwe mwijiisyege ku bandu bo abo, na ku bangi boosa, aba pamopeene bikwijuula ukujibomba imbombo iji.

17 Naahobwike fiijo bo biisile apa ukufuma kumyinu, baa Sitefana, Folitunati na Akaiki, paapo ukwisa kwabo kokuti nuumwe mwalipo.

18 Baasangalwisye indumbula jangu, ni syinu syope. Po mubiimikege fiijo abandu bo abo.

‡ 16:10 16:10 Bala kalata gwa 1 Abakolinti 4:17. § 16:15 16:15 Bala kalata gwa 1 Abakolinti 1:16.

¹⁹ Abandu abaa mfipanga ifya Kyala ifya mu Asija, bikubaponia. Akwila na Pilisika, pamopeene na biitiki aba bikubungaana mu nyumba jaabo, bikubaponia fijo mu ngamu ijaa Ntwa.

²⁰ Abaamyinu ndwitiko aba bali apa, bikubaponia. Namuponaniege ku lugano lwa Kilisiti.

Uluponio ulwa Pauli

²¹ Une Pauli ngusimba isya kubaponia isi ni kiboko kyangu jujuune.

²² Umundu gwesa uju akanngana uNtwa Jesu, agunigwege. *Malanata*, Ntwa gwitw isaga!*

²³ Ipyana lya Ntwa Jesu lijege pamopeene na nuumwe.

²⁴ Ulugano lwangu lujege na nuumwe mwesa, mwa Kilisiti Jesu.

* **16:22 16:22** *Malanata* isyu lya Kialimaiki, kokuti *Ntwa gwitw isaga*.

Ulwitikano Ulupya
Portions of the Holy Bible in the Nyakyusa-Ngonde
language of Tanzania: Ulwitikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2025-05-20

PDF generated using Haiola and XeLaTeX on 19 Dec 2025 from source
files dated 20 May 2025

14ff4521-53e4-562c-aacb-6f4faf55a6c8